

CIPWAMWÒYÌ CYÀ NYUMÀ



Mpindyewu ngítàbùùjì, mpindyewu
ngítàbùùjì,
Bintu byònsò bìdi mwà kwenzeka, mpindyewu
ngítàbùùjì;
Mpindyewu ngítàbùùjì, mpindyewu
ngítàbùùjì,
Bintu byònsò bìdi mwà kwenzeka, mpindyewu
ngítàbùùjì.

² Twǎnjì kushààlaayi biimanyine kuulu bwà katancì kakesè mpindyewu bwà Dìyì dyà Mukalenge. Tubuululàayi mu Amòsà, mupròfetà Amòsà, nshapità mwi³, biikale tubangila ku mvensa wa 1.

³ Ndi muswè kwela Mwanèètù wa bakàjì Juanita ne Anna Jeanne ne Mwanèètù wa bakàjì Moore, bwà bipunguluji bilenga byà misambu abi. Mbingaluje paanyimà, pàmvwà musòmbe lwà kuntu kwaka mwikale mbitéèleja. Mvwa munkacì mwà kwela meeji, pavwàbò neetù, bìmba misambu mu kampanyè, Mwanèètù Jack ne mèmè tuvwa tuyiikila, bânà bàà bakàjì abu bavwa bânà bàà bakàjì batekète menemene, ànu bakesè bàà bidimu dikumi ne bisambòmbò, cintu bu nàнку awu, mwànà wa bakàjì. Mpindyewu, ndi ngeela meeji ne, Mwanèètù wa bakàjì Anna Jeanne ùdi ne bânà bataanu, ne Mwanèètù wa bakàjì Juanita ùdi ne—ùdi ne . . . mmamwèndè wa bânà bàbìdi. Nènku tudi batambe kuseemena pabwìpì menemene ne dibwela dyà díbà adi, bakàjàànà, kutàmba mutùvwà musangu awu, kùkaadi bidimu bitwe ku dikumi ne bisambòmbò. Kabyàkunèngakù to, netùsabukè, cikondo cyà butùmbi aci.

⁴ Mpindyewu mu Amòsà nshapità mwi³, tubalàayi.

Tèèlejàayi dìyì edi didì MUKALENGE unùdyula naadi, Éyì bânà bà Izàlèlèl, bwà kudyula famiye mujimà ùndì mupàtule . . . pambelu pàà Ejiipitu, ngàmbe ne:

Ànu nwènù nkààyeenu ki bândì mumanye . . . mu famiye yònsò yà pa buloba: ki bwà cinyi nènnùnnyookè bwà . . . bubì bwènù.

Bantu bàbìdi bàdi mwà kwendela pàmwè, pàdìbo kabàyi bumvwàngàne anyi?

Ntambwe neàkungule mu diitu, pàdiye kàyì mukwate nyama anyi? mwànà wa ntambwe neàdile mu bwinà bwèndè, piikalàye kàyì mukwate cintu nànsha cimwè anyi?

Nyuunyi ùdi mwà kupiika mu buteyi pa buloba, mwaba ùdiku kakùyì musùbùla mumwelela anyi?

musùbùlù udi mwà kupawuka mu buloba, kàdi kawùyi mubàkùle cintu nànsa cimwè mu wòwò anyi?

Mpungi neèdiibwè mu cimenga, bantu kabàyi bacìna anyi? nekwikale bwalu bubì mu cimenga, kàdi MUKALENGE kàyi mubwenze anyi?

Ncyà bushùwà ne Mukalenge... kàakwenza cintu nànsa cimwè to, kàdi yéyè ùdi ubuulula mìnsokòntù yèndè kùdi basadidi bèndè baprófetà.

Ntambwe nyewu wàkungùlù, wabenga kukwacika bwòwà ngyani? Mukalenge... nyewu wàkùlù, ùdi kàyi mwà kwamba ciprófetà ngyani?

Twinyikàayi mitù yètù.

⁵ Mukalenge Yesù, swàku bwà eci, Dìyì Dyèbè, Mukalenge, swàku bwà twikalèku ne bwobùmwè dilòòlò edi banyungulukile citùpà eci. Tudi tulòmba, Mukalenge, bwà Wèwè kutùpa dyumvwija bwà cyena-bwalu eci, citwàngacilà lwà mwab'ewu, ne swàku bwà citwalè bunème k'Údì. Tùbènèshèku patùdi bindile apa, Mukalenge, dilòòlò edi, pa Dìyì Dyèbè. Ondopa babèèdi ne bàdi mu ntatu. Sùngilaku bajimine. Filaku dikàndà kùdi batekète, Mukalenge, bàdi bènda batekèta, ne mu mubidi ne mu nyumà. Nènku ùtùpeku dipongoloka dinène dyà Bwikadi Bwèbè, bwalu tudi tulòmba nùnkù mu Dìna dyà Yesù. Amen.

⁶ Ndi njinga kwangata bu cyena-bwalu, kwangacila pa bwalu ebu, dilòòlò edi ne: *Cipwàmwòyì Cyà Nyumà.*

⁷ Kanùpu mwoyi to, mààlabà, ndisambila dyà babèèdi mààlabà. Tudi batèkèmene ne Mukalenge neènzè bintu binène menemene, mààlabà mu mapingaja pa dìbà ibìdì jaajaaja, mutùdi... patwàbangà masangisha ètù. Nsongàalùme ewu neikale mwab'ewu bwà kwabanya twarta twà disambila. Nènku nebàsambidile muntu yònsò wàjinga bwà kumusambidilabò awu. Nènku tudi batekemene cikondo cyà dicyònkòmoka, mààlabà, mu Mukalenge.

⁸ Mpindyewu nwènù bàdi batwendele mwab'ewu, beenyi bàà pambelu pàà cimenga. Vùlukàayi ne, kùdi èkèleeziyà milenga, ya Èvànjeeliyò mu kaabujima mu cimenga cijimà emu. Bònsò abu bàdi bànùjingila difika dilenga.

⁹ Mvwa nyiikilangana ànu ne umwe wa ku bampaasàta bakwàcishanganyi naanyi, lwà pambelu pàpa, ùcifuma ànu ku dibwela, Mwanèètù Jackson, kumpàla ùvwa wa mu èkèleeziyà wa ba-Methodistes, kwìnshì kwètù eku kupita cimenga cimwè anyi bìbìdì.

¹⁰ Kàdi mbanganyi kaaba aka bàdi baswikàkane ne tabernacle, tumònààyiibi byanza byènù, myaba yònsò. Èkèlekèle, ndi ne disànkà—ndi ne disànkà dyàbùngì bwà kwikala neenù mwab'ewu. Edi ndisangisha ndìmvwa mutàmbe kulamakana naadi pàmvwà nsanganyiibwa mu Indiana kùkaadi cipòòlò cyà

cikondo. Ndi ngeela meeji bwà kwalukila, àbìdì àdì panshi aa, ne kwasa ntenta ne kwangata Mpungi mwandamutekète yà ndekeelu ayi, bu Mukalenge mwà kwanyisha.

¹¹ Pa nàнку, mpindyewu, kàdi nwavùlukaayi mààlabà. Kanùwùpukù mwoyi to, mààlabà pa dìbà ìbìdì jaajaja. Nènku, mpindyewu, disangisha dyètù dyàlondà nedyènzekè mu lumingu lùlwalwà elu, mu Tampa, mu Floride.

¹² Mpindyewu ndi muswe kwakula pa ne: *Cipwà-... Cipwàmwòyì Cyà Nyumà*.

¹³ Mpindyewu, kakwàcikwètù keena butùdì twakula aka, Amòsà, bwà katanci kakesè cyanàànà, bwà kupeta mwaba wà kushindamijila bitùdì twamba kumpàla kwà twètù kufika ku cyena-bwalu. Eci cìvwa mmu cikondo cyà ditanta dinène mu Sàmaalèyà. Izalèlèlè ùvwa mutante. Bàvwa bushùwà balonde maalù à pa buloba ne bàvwa batante.

¹⁴ Misangu yònsò ditanta kaditu ànu cimanyinu cyà mabènesha à nyumà to, kàdi mînga misangu bitù bipangilangana. Bantu bàtu beela meeji ne pàmwàpa bikèngela wikale mupetè bintu byàbùngì byà pa buloba, ne bìdì bìleeja ne Nzambì ùdì ùkubènesha. Aci kî ncilelèlè to. Misangu mikwàbò bitu mùshindù mukwàbò.

¹⁵ Kàdi tudi tumusangana, yèyè, katwena bamanye byàbùngì pa bìdì bitangila kakwàcikwètù aka to. Yèyè, katwena ne bwalu bulonda to, bwà kudiye mufùme. Tudi bamanye ne yèyè, bilondeshile Mufundu ewu, mmuntu wa mu cisuku, kàdi Nzambì ngwakamujuula.

¹⁶ Ndi mwà kudifwànyikijila mmòna, dîngà ditùkù dyà luuya lukolè mu Sàmaalèyà amu, cìmwè cyà ku bimenga binèna byà kubandila byà pa buloba mu ditùkù adi. Ncintu kampànda cyà mu cipidi, mutùdì bafwànyine kwamba, cyà Miami, anyi—anyi Hollywood, Los Angeles, yimwè yàà ku myaba yà mùshindù awu ayi, mwaba kampànda munène bwà babandidi. Nènku tudi ànu mwà kudifwànyikijila twètù munkaci mwà kumumòna. Kacya kavwaku mwanji kwikala mu cimenga bu nàнку to. Kàdi, yèyè ùvwa ne Dìyì dyà Mukalenge, ùvwa ulwa mu cimenga cinène eci mùvwa mpèkaatù muungwile ku luseke ne ku luseke lwònsò. Bambi bàkaavwa bayè bònsò kule ne Dìyì dyà Nzambì, kàdi kabàvwa bapete mupròfetà to kùkaavwa bidimu bipitèpite.

¹⁷ Nènku kakwàcikwètù aka, nkenzà ànu kimana pa lusongo lwà kakùnà, byenze ànu bu ku nord wa Sàmaalèyà, ndi mwà kudifwànyikijila nkamòna, muunya mukolè awu ukenkesha, ne mwedi wèndè wa mvyà ku cibàngà, ne twìsù twèndè tukesè atu tukèepesha, ne mutù wèndè mukèsè awu, wa dibàla uvwa ùbàlakana, pàvwàye upwekesha mèsù pa cimenga aci apu. Ki mèsù èndè kukèpelawù. Yèyè kàvwa munkaci mwà kutàngila citù babandidi bàmmòna pa ciibidilu to, bwà kuya mu cimenga ne kumòna bisànkasanka byònsò byà bulenga bwàci.

Kutàngilayè ne kumòna ne mùshindù kaayi ùvwà cimenga aci cishààle, cimenga cìvwàku kale wàwa cimenga cyà Nzambì, ne ciye kabwela mu nsòmbelu wa ciipanshi bu nàнку. Kabyena bikèmesha to. . .

¹⁸ Kakwàcikwètù aka, muntu uvwa kàyì mumanyike ewu ùvwà ng'Amòsà mupròfetà. Nènku mpindyewu katwèna bamanye byàbùngì menemene bwà bwalu bwèndè to. Katwèna bamanye kudiye mufùme to. Bapròfetà pa ciibidilu bàtu babwela mu cyalu, kabàyi bamanyike nànsha, buumuka mu mùshindù ùmwèùmwe awu. Katwèna bamanye kudibo bafùmina, kuyààyàbo to, katwèna bamanye bishimikidi byàbò to. Nzambì ngudi ànu ùbajuula nàнку. Kavwa wa batàmbe kutangila to, kàdi ùvwà ne EMU MMÜDÌ MUKALENGE WÀMBA. Ki cintu cyà mushinga cìndì mmòna ncyòci aci. Mu bushùwà bwà bwalu, yèyè wàkalwa ku Sàmaalèyà bwà kubanga kampanyè kèndè. Ndi mutwishìibwe ne kavwa ne dyediibwa dyà mu dibòkò dyà kùdì muntu nànsha umwèpele to. Kavwa ne karta kàà buumambàlà kàà ku dìngumba nànsha dìmwe to. Kavwa ne mikàndà yà dijaadikiibwa naayi bwà kuleeja ne ngwa mu kasùmbù kaayi to. Nènku, kàdi, yèyè ùvwà ne cintu cimwèpelè, ùvwà ne Dìyi dyà Mukalenge bwà ciine cimenga aci.

¹⁹ Nenku ndi ndikonka, bu twètù mwà kutùntùmuna Amòsà, leelù ewu, kumubweja mu cikondo cyètù emu, Ndi ndikonka ní ùvwakù mwà kwakidiibwa mu cimenga cyètù leelù ewu. Ndi ndikonka ni tuvwa mwà kumwakidila, pèshi ni tuvwa mwà kwenza ànu mwàkenzabo amu. Tudi tusangana bimenga byètù mu kanyawù kàmwèkàmwe aku. Nènku tudi tusangana ne mpèkaatù udi ànu munène munkaci mwà bantu, ànu mwàkadibi musangu awu amu. Nènku ndi ndikonka ne, piikalà muntu mukèsè, udi kàyì mumanyike ewu, yèyè neàbange kampanyè aka bishi? Mmunyi, neàbangilè mene penyi? Ng'èkèleeziyà kaayi wìkalaye mwà, anyi wèlangana nendè dibòkò? Kavwa ne cintu nànsha cimwè cyà kuleeja ne ùvwà mufùmìne penyi to, kàvwa ne cintu nànsha cimwè to ànu EMU MMÜDÌ MUKALENGE WÀMBA bwà cimenga aci.

²⁰ Yèyè wàkabàsàngana batàmbe kwatuka ne batàmbe kubola, cìvwà ncikondo cyà dicyònkomoka. Bakàjì mu cimenga aci bàkaavwa bashààle ànu bu mùdibo mu États-Unis emu. Bàkaavwa bashààle bakooyike. Cintu cyònsò cìvwà Nzambì mutèkèmene kùdìbo, bòbò bàvwa baye kwà cyaanàna. Nènku—nènku tudi tusangana ne ùvwà mmwaba munène ùvwàbo ne bijjìdi byà maja mu mùsèsèsù, bakàjì ne nsòmbelu wa masandi wa bàdivùùla bilàmbà ne bikwàbò, benze bu bajì bàà maja bàà bàvùùla ne bilàmbà. Mu bushùwà bwà bwalu, aci cìvwà ndinàya dyà bantu bitwilàngane mu matùkù awu, mpindyewu nditùkù dyònsò dicyaacyà diiliilà edi. Lekela luuyà ludidìnge lùbàngè, kabyàkukèngela bwà wèwè kuya ku cibilu to. Bàdi bwònsò mu mùsèsèsù, mwaba kanà wònsò, bòbò biine. Bundù bwènù

nwènú bakàjì, bwà kwenza cintu bu nàнку! Kanwènaayiku nudyùmvwà bundù anyì?

²¹ Ki pashìishe—ki pashìishe mèmè kwambila mukàjì kampànda mwab'ewu, ànu àbìdì àdì pànshì aa, kwambaye ne: “Mòna's,” mwàkambàye, “Mwanèètù Branham,” ne, “aci, aci's—aci's ki mùdì bakàjì bakwàbò bònsò aba.”

²² Mèmè ne: “Kàdì twètù katwèna ne cyà kwenza maalu bu bakwàbò bantu to. Tudi bashìilàngane. Tudi ba—bantu bashìilàngane.”

²³ Cìdì cìmvulwija mukàjì kampànda, wàmba ne: “Èè, Mwanèètù Branham,” mukwàbò pèndè ne: “Mèmè—mèmè—mèmè ncìtu mvwala tuputulu atu to.” Wàmba ne: “Ntu mvwàla mìpanù.”

²⁴ Mèmè ne: “Aci's ki cìdì cìbì citàmbe.” Uh! “Nzambì mmwambè ne: 'Ncinyangu,' ku mèsù Kwèndè, 'bwà mukàjì kuvwàlayè cilàmbà cìdì cyakànyine muntu mulùme.’” Aci's ncyà bushùwà menemene.

Umwe kwambaye ne: “Èè, kabàcyèna benza bilàmbà byà mùshindu mukwabo to.”

“S'bàcìdì ànu benza màshinyì a bilàmbà ne bilàmbà byà mpeesà.”

²⁵ Kakwenaku pàà kumbingidila nànsha kakesè to. Cìdì ànu eci cìdì munda mwà mwoyi aci. Ki cìdì cidileejila pambelu aci. Cìdì—cìdì cidimanyisha nkààyaaci.

²⁶ Nènku mpindyewu tudì tusangana ne, mu cimenga eci, e kulwaci cyatùke mu nsòmbelu mulenga. Bayiishi bàvwà baciina bwà kwamba ní ncinyi ní ncinyi pa bwalu abu. Nènku, kàdì bàvwà ne kalumyànà kakesè, kakesè kàà kale kuumukilà kù kakùnà kwàka, kàvwà kàlwa bwà kubambila EMU MMÙDÌ MUKALENGE WÀMBA ne: “Sukùlaayi cintu cyònsò eci, bwà cyanàànà nuyààya mu bupika.” Ne yèyè wàkashààla ne mwoyi too ne mwàvuye kumòna matùkù àkùla cipròfetà cyèndè aci. Wàkamba cipròfetà mu matùkù a Yelòbòàmà Mwibìdì, uvwa mwikàle ànu mubèngìlwe twamb'eku twamb'eku; yèyè—yèyè ùvwa wànyisha matùnga makwàbò. Nènku—nènku Amòsà mukèsè ewu kwamba cipròfetà e kubàmbilayè, kwambaye ne: “Nzambì mwine unùdì nulàka mukana nwamba munùdì nukwacila mudimu awu, Yèyè ki wanùbùtula.” S'ki cyàkenzaYe.

²⁷ Nènku bu dīyì Dyèndè mwà kwikala kaaba aka dilòlò edi, mu . . . mu Birmingham emu, s'dìvwà difwànyine kwamba cintu cìmwècìmwè aci bwà màkèleeziyà's. “Nzambì mwine unùdì nulàka mukana nwamba munùdì bamukwàcile mudimu awu, s'neànùbutule dīnga ditùkù.” Ncyèna ngambila batèèleji bàdì apa aba to. Mikàbà yà mèyì eyi yiyaaya pa buloba bujimà. Mpindyewu, vùlukààyi ne, aci's ncilelèlà.

28 Pashiishe yêyê kujandula, pàakabwelaye mu cimenga ne, yêyê... bintàkanyi byònsò ebi, ndi ndikonka ànu mùshindù ùvwàye ne cyà kwikala mudyũmvwè's bwà kutàngila ne kumòna kanyawu kàà bantu bàà Nzambi aku, bàvwàye mutumiibwe kudibo abu.

29 Ndi ndikonka ní tudiku bafwànyine kumwakidila mpindyewu anyi? Bu yêyê mwà kubwela, tudikù—tudikù bafwànyine kwelangana nendè kaapà anyi? Tudikù bafwànyine kumupèèsha byètù—byètù byà bitàmbe bwímpè byònsò anyi? Tudiku bafwànyine kumupà ntema yètù anyi? Tudiku bafwànyine kunyingalala piikalabi ne yêyê ngudi mutwambile ne bivwa bikèngela bwà twètù kwalukila ku Diyì dyà Mukalenge ne kwenza mùshindù ùdì Mukalenge mwambe bwà kwenza anyi?

30 Ndi ndikonka cidi bânà bèètù bàà bakàji bafwànyine kwenza pa bìdì bitangila nsuki yàbò mibebula ayi's? Mbafwanyineku kulekela nsuki yàbò ayi yileepa cyàkàbìdì, bu Amòsà mwà kulwa anyi? Yêyê's mmufwànyine kuciyyiisha, ne ndi nnwambila nàнку, bwalu aci n'Diyì dyà Mukalenge.

31 Ndi—ndi ndikonka ne tusumbù twètù—tusumbù twètù tudi tupàtula balami, bàdì baselangane misangu yisatu anyi yinaayi, ne—ne bikwàbò byà mùshindù awu, ne bateeta kwikala balami, ndi ndikonka ne bintu byònsò ebi, ndi ndikonka cidiye mufwànyine kwenzela mulùme udi mwà kulekela mukàjèndè ùlwàta kàpùtulù ne ùpàtuka mu mùsèèsù pambèlu pàpa, ne ukòsa mashinde mu bulà, pambelu mu bulà amu, pàdì balùme bapicila mwaba awu? Ndi ndikonka cidiye mwà kwambila mulùme wa mùshindù awu nàнку?

32 Ncyà bushùwà ne yêyê uvwa mufwanyine kucitonokela ne byònsò bivwà munda mwèndè abi, bwalu ùvwa ne EMU MMÜDÌ MUKALENGE WÀMBA, ne yêyê kavwa mwà kwenza cingà cintu to ànu aci. Wàkabàsangana mu ditùkù adi ne disaamà dibì ditàmba, dyà cipwàmwòyi cyà nyumà, nènku s'ke citùdì naaci leelù ewu eci menemene.

33 Mpindyewu, mmunyi mwàkamanyaye civwa mwà kwenzeka? Mmunyi mùvwà Amòsà mufwànyine kumanya? Dyàmbedi, yêyê ùvwa mupròfetà. Nènku, cintu cidi cilondà, ùvwa mumanyine ku disaamà civwà dijandula dyà disaamà, ne ùvwa mwà kumanya civwà bipeta.

34 Bu ngàngàbukà mwà kutàngila cyùja ne kumòna ne cyùja aci cikaadi cyele miji, yêyê mmumanye ne kakùcyena cintu nànsha cimwè cidi cishààle to ànu lufù. Kwajiki, ànu Nzambi mwenze cintu kampànda pa bwalu.

35 Èè, paùdì utàngila cimenga, utàngila cisàmbà, udi utàngila èkèleeziyà, ne utàngila cisàmbà cidi ciikale kule menemene ne Nzambi, kakwèna cintu nànsha cimwè cyà kujandula to pakuumusha ànu: "Mpèkaatù! 'Ne difutu dyà mpèkaatù ndufù.'

Cifwafwa.” Dijandula didi dijaadika cidi bwalu. Nudi numòna’s, pàdi bantu baya kule ne Nzambi ne kabàyi baswè kutèèleja Dîyì to, kabàciyì ne dijinga nànsha dikesè bwà Dîyì, dîbà adi kùdi cintu ànu cimwè cyà kujandulaku ne: “Musùùkà ùdi wenza mpèkaatù, musùùkà awu ki wàfwà.’ Bupidyà nebùkutapulule ne Nzambi.” Ncyà bushùwà menemene.

³⁶ Cyòci aci, yèyè ùwva mumanye cìwva dîsaamà, cìwva bipeta, pàakamònaye dîsaamà dyà—dyà mpèkaatù mu cimenga.

³⁷ Mpindyewu, cipwàmwòyì eci, mbatwámibile ne cidi ci—ci—ci. . . cikufikisha mu mùshindù wà kùyi mwà kudìmanya wèwè mwine nànsha. Mpindyewu, ncintu cidi kaciyi cyà ciibidilu nànsha. Kacitu cyènzekanzeka bikolè to, kàdi ncilela kùdi mukumu. Mmuntu kampànda udi kàyi nànsha mumanye ne yèyè nganyì to. Nudi nucipetela ku mvità, mînga misangu, màsàlaayi asòmbela acipeta. Mînga misangu bantu bàtu bacipeta. Cìkwàbò cintu citù cìcilela, ndidyàbakeena. Didyàbakeena nedìcilelè.

³⁸ Didyàbakeena kaditu ne bukolè mu dyòdi to, nànsha kakesè. Èyowà, sambukaayi—ànu—ànu—ànu didyàbakeena, ne nwitabe diitabuuja.

³⁹ Muntu mukwàbò uvwa wàmba ne: “Èè, mpindyewu, kàdi bu wèwè ne cyà kwashiibwa ku cingoma maalaba mu dindà, kwèna mwà kudyàbakeena anyi?”

Mèmè ne: “To, ncyèna ngeela meeji nànkù to.”

“Bwà cinyi?”

Mèmè ne: “Didyàbakeena kadyèna mwà kwenza cintu nànsha cimwè to ànu kutàmba kungenzela bibi.”

“Èè, bìdi ne dikwàcisha kaayi bwà kwikala ne diitabuuja?”

Mèmè ne: “Ndifwànyine kunsùngila’s.” Nènku aci’s ncyà bushùwà, nwamònu’s.

⁴⁰ Pa nànkù didyàbakeena kaditu ne bukolè munda mwàdi nànsha, nànsha kakesè, kàdi diitabuuja didi ne bukolè bwònsò. Itàbuujà!

Mpindyewu didyàbakeena mînga misangu ke ditù dïcilela.

⁴¹ Cìkwàbò cintu citù cìcilela munkaci mwà bantu, ndisanganyiibwa pankaci pàà mmwènu yìbidi. Ki cyàlèlè cipwàmwòyì ncyàci. Nènku cidi cikufikisha mu mùshindù wà wèwè—wèwè, mu bushùwà bwà bwalu, cyùdi mwenze, udi mujimije lungenyi lwèbè. Udi mujimije lungenyi. Kwèna mwà kwenza. . . Kwèna mumanye ne wèwè udi nganyì to. Kwèna mwà kudìmanya wèwè mwine to. Udi mwà kwendakana, kudyà ne bikwàbò byònsò, kàdi, wèwè, kwèna ànu mwà kudìmanya to. Udi ne dilonga dyèbè dyà tùlaasà, udi mwà. . . dilonga dyà tùlaasà òmwèdìmwè dyùdi mupete adi, kàdi kwèna umanya ne ndifumine penyì to, kwèna mumanye ne wèwè udi nganyì, udi

wa penyì to. Ke disaamà dyà cipwàmwòyì ndyàdi, ke mùdìbo batwambile nàнку awu.

⁴² Tudi bamanyika pàmwè ne mékù ètù, mu nsòmbelu wa buntu ewu, ku dibàkà. Nènku ne bakàjì bèètù, batùdì tusèla, ne díkù dyètù ndimanyikila ku disangila dyà dyètù—dyètù—dyètù dibàkà. Nènku dībà adi, mbyà kwela meeji bìshi, ambàbi tǔng bu cintu cidì cyènza bwòwà eci mwà kukwenzekela ne kuciyi mwà kuvùluka ne ùdì musele nganyì, mukàjèèbè nganyì, bânà bèèbè mbanganyì, tatwèbè ne mamwèbè mbanganyì, anyi ne mutumba neebè nganyì to? Aci's ncifwànyìne kwikala cintu cyà—cyà cyènza bwòwà's.

⁴³ Dībà adi tudi bamanyìibwe, kàbidì, tudi mwà kudimanya twètù biine bu bàà mu bukwàbantu, mu kwikala ne meeji ne—ne kwikala bashiilàngàne ne mwoyi wa nyama. Nyama kèna mwà kwela meeji to, ùdì yèyè wènzela maalu ànu ku myadi. Kèna ne musùkà to. Nènku, kàdi, twètù tudi mwoyi wà bukwanyama. Cidì citùvwija twètù bashiilàngàne ncinyì. . . Twètù tudi nyama yidì yàmwisha, kàdi cidì. . . Nyama mwamwishi awu ùdì ne mashi à luuyà, ne twètù tudi mu lukebu lwà nyama. Kàdi cidì citùvwija twètù bashiilàngàne, tudi tumanyikila ku diikala ne musùkà, kondo kàà mwoyi kàdi kàtwàmbila cidì cìmpè ne cidì cibì.

⁴⁴ Mpindyewu kùdi mwaba, paùdì ukwacika kùdi disaamà dyà cipwàmwòyì edi, udi mufwànyìne kushàala bu Nebùkàndènèèsà, mmwòmò, wàkadibàndisha musangu kampànda, kàdi Nzambì kumulekelaye bwà afike ku dyela meeji ne yèyè ùvwa nyama. Nènku wàkaya kasòmbèla mu cipèèlà ne—ne kùdya mashinde bu ngombe. Nènku—nènku nsuki yèndè—yèndè yàkaleepa kupweka ne mubidì wèndè, byènze bu masàlà à mukanku, ne kupetaye mwoyi wà nyama munda mwendè. Nwamònu anyì? Aci's civwa disaamà dyà cipwàmwòyì, bwalu wàkapwà mwoyi ne yèyè ùvwa mfùmù. Ùvwa mupwè mwoyi ne yèyè ùvwa muntu. Nènku kwelaye meeji ne ùvwa nyama, ke kwenzaye maalu bu nyama, bwalu uvwa mupwè mwoyi ne uvwa muntu.

⁴⁵ Aci's ncipeepèlè ànu cyà menemene, leelù ewu. Ne tutu tupwà mwoyi, misangu mikwàbò, cidì Èkèleeziyà wa beena Kìlistò. Tutu twenza maalu bu bàà pa buloba. Aci cidì cìleeja ne tudi ne disaamà dyà cipwàmòyì cyà nyumà, bwalu kwèna wenza maalu bu mwena Kìlistò to. Udi wenza maalu bu bàà pa buloba. Udi upeta mwoyi wà bàà pa buloba, ki kulelawò cyòci eci.

⁴⁶ Apa tudi—tudi tusangana ne Izàlèèlà ùvwa mwadije, mwadijìibwe ku maalu à pa buloba, ne ùvwa mudìshinde mu ciibidilu eci. Nènku mupròfetà ewu mutùmìibwe bwà kubàpàtulamù, bu yèyè mwà kufùdisha, ne kubàmbila. Nzambì, ku ngàsà Wendè, wàkasungula Izàlèèlà munkaci mwà mékù wònsò à pa buloba. Ngàsà nguvwa mwenze nàнку. Ùvwa mubàpe buloba busungula. Wàkabapa nzùbu yìvwàbo kabàyi

ne cyà kwibaka to. Nzambi ngwàkenza nàнку, mubasungule. Wàkabàpèèsha madimi àvwàbo kabàyi basùmbe nànsha. Wà—Wàkabàpèèsha, Wàkabàpèèsha cyàkudyà cìvwàbo kabàyi bakune nànsha. Wàkabàpèèsha biina byà màyi bìvwàbo kabàyi bùmbùle nànsha. Wàkabàpèèsha bucimunyi bìvwàbo kabàyi bacimùne nànsha. Wàkabàpèèsha ngàsà ùvwàbo kabàyi bakùmbànyine to. Nzambi ngwàkenza nàнку ku ngàsà Wendè bwà cisàmbà eci, Izalèlèlè, musungula Wendè, munanga Wendè.

47 Ne Wàkamba, mu Bible ne: “Wàkamusangana mu budimi, ànu bu mwàna wa bakàji mutekète musòmbe mu mashi èndè yèyè mwine, ne Wàkamowesha màyi ne wàkamusukula, ne byàkenzaYe. Kàdi paanyimà pàà Nzambi mumane kumuleeja luse lwònsò elu, ke yèyè kupeta bubanji,” kupetayè disaamà dyà cipwàmwòyi, disaamà dyà cipwàmwòyi, “ne kupwàye mwoyi mu byònsò kùvwà bintu ebi bifùmìne.”

48 Ngeela meeji ne aci ncimfwànyì cyà U.S.A. ewu, mu cidimu cyà 1964. Udi ùsaama disaamà òmwèdimwè adi. Twètù tudi èkèleeziyà minène ya bukolè. Tudi cisàmbà cinène, cyà bukolè. Tudi mìliyò ku búngì, ne tudi bapwè mwoyi mwaba wùdì bintu ebi bifùmìne.

49 Bávwa naadi dyà dibì be. Paanyimà pàà Nzambi mumane kwikala mwímpè kùdìbo, ne mubàpatule mu malaba ónsò à bampàngaanù, ne mubàvwije cisàmbà citàpùlùke, mubàtápùlule bwà kwikalabò Bèndè. Yèyè ne: “Yèyè wàkangata mwonji wa mvinyò mu ditùnga dikwàbò ne kuwùkunayè mu dikwàbò ditùnga, ne mùshindù wàkawujiikaye bwà kuwùfikisha ku dikwàmà dyà mamuma ne kwikala ne mamuma, kàdi mwonji wa mvinyò wàkapwà mwoyi kuvwà mabènesha àwù mafùmìne.”

50 Ki mùdì kàbìdì cisàmbà cyà Nzambi cyenzè, mu matùkù à ndekeelu aa, cipwè mwoyi cidi bujaadiki bwà kwikala mwena Kilistò bùumvwija. Cidi cyàkàbìdì, disaamà dyà cipwàmwòyi edi ndikaadi dilwè pa bantu. Kabèèna mwà kudimanya bóbò biine to.

51 Bóbò, bàkaadi baCipwe cyònsò mwoyi. Bàkaavwa bapwè mwoyi cijila Cyèndè. Bàkaavwa bapwè mwoyi mikenji Yèndè. Bakàji bávwa bènza maalu ànu mùvwà bakàji bakwàbò bònsò bènza amu.

52 Èkèleeziyà wa Nzambi ne cisàmbà Cyèndè citu misangu yònsò ànu: “Cisàmbà citàpùlùke, ci—cisàmbà cibìikila bwà kupàtuka, cisàmbà cyà pabwàcì, ditùnga dyà cijila, bwakwidi bwà bukalenge; cilambula mìlàmbù yà nyumà kùdì Nzambi, mamuma a mishikù yàbò, yifila butumbi kùdì Dìna Dyèndè.” Nzambi wàkabìikila Èkèleeziyà Wendè ne kuMutapulula ne maalu à pa buloba, bwà kiipacila mene aku. Nènku Wàkamupèèsha mukenji, ne Yèyè, Udi, ne cyà kwikala wa cijila. Wàkamba ne: “Mèmè ndi wa cijila, ne nudi ne cyà kwikala bàà

cijila, ne kakùyi cijila to muntu nànsha umwe kààkumònaku Mukalenge to.” Nzambi ngudi mwambe nànkù, Yèyè mwine.

⁵³ Nènku Yèyè uvwa mubiikile bantu aba bwà kwikalabò cisàmbà cyà mùshindù ewu, kàdi bôbò bààkapwà bwalu abu mwoyi. Bàvwa bapwè mwoyi mikenji Yèndè, ne bàvwa bapwè mwoyi nsòmbelu wabò mulenga. Bakàji mu mùsèèsù, bakàji bàà beena Izàlèlèlè pambelu pààpa, muntu ne muntu mwikàle mwindile bwà—bwà kwimitayè ku bukolè bwà Nyumà Mwímpè, bwà kupàtula Maasiyà, ne pashìishe kwenza maalu mùshindù awu. Ngiikadilu wabò ùvwa wènza bwôwà.

⁵⁴ Ndi muswè kwanji kwimana ndambù mwab’ewu, bwà kwamba ne ncintu cìmwècìmwè aci munkaci mwà bantu bèètù, leelù ewu, bàdi badibiikila mùdìbo beena Kilistò. Ngiikadilu wabo, bu wèwè nànsha mwà kumanya’s!

⁵⁵ Musangu kampànda, mu Sud. Mwva mubale bwalu kampànda bwà kuntwaku, mùvwàbo ne ciibidilu cyà kwikala ne bapika. Bàvwa mwà kwangata bantu abo ne kubàsumbisha mu cisalu, ànu munùdi mwà kusùmbisha kàshinyi kà kale amu. Kàdi kùvwa musùmbi, mwendedyanganyi wa mushinga, uvwa mwà kupicila mwab’awu ne kubooyangana ne bapika abu e kuya kabàpàànununa, nènku ànu bu mùdi mufwànyine kupàànununa kàshinyi anyi cintu kampànda amu.

⁵⁶ Ne bapika abu bàvwa kule ne ditùngà dyàbò. Bàvwa beena mu Àfriké. Bàtùmbùlà kubàkwàtabò, kulwabò naabò kunu ku bisanga ebi eku, ne pashìishe kubàbwejabò mu mifindifindi mu Ètats-Unis kàdi kubàsùmbisha bu bapika, lwà ku Jamaïque ne eku ne eku.

⁵⁷ Mpindyewu tudi tusangana ne bantu abu bàvwa babungàme. Bàvwa bakwàciibwe nu ditùngà dyàbò. Bàvwa baya naabu kùdi mwena lukuna, nènku bàvwa babungàme. Kabàvwa mwà kumòna kàbidi baabàyaabò to, anyi bakàji bààbo kàbidi to, tatwàbò ne mamwàbò, bânà bààbò nànsha. Bàvwa kakùyi mpatà to . . . Bivwa bikèngela bwà kwikalabò bàbèèla mfimbu, ne nkodi, bwà kubènzejabò mudimu, bwalu bàvwa bantu babungàme.

⁵⁸ Nènku dīngà ditùkù, mwendedyanganyi wa mushinga kupicilaye mu budimi kampànda, kumònaye musùmbà wà bapika pambelu apu bènza mudimu. Ki yèyè—yèyè kubwela e kukonka mwena budimi abu, kwambaye ne: “Udi ne bapika bungi kaayi?”

Yèyè ne: “Batwè ku lukàmà.”

Yèyè ne: “Udikù ne bàà kushintakaja anyi kusumbisha anyi?”

Yèyè ne: “Èyowà’s.”

Yèyè ne: “Ngànji mbakenketebi tūng.”

59 Ki kubwelaye mu budimi amu ne kubàtàngilaye, ki kumònyaye ne bìvwa bikèngela bwà kwikalabò bàbèèla mfimbu. Nènku paanyimà pàà katanci, kumònyaye nsongààlùmè kampànda uvwabò kabàyi ne cyà kwela mfimbu to. Uvwa ne cyàdi cyèndè citàdika ne cibàngà cyela muulu; kabivwà bikèngela kumwela mfimbu to. Ki mwendedyanganyi wa mushinga awu kwambaye ne: “Ndi njinga kusùmba mupika wàwa.”

Ki yèyè ne: “Kàdi kî ngwa disùmbisha to.”

60 Yèyè ne: “Èè, ndishìilangana kaayi didi kùdi ewu mupika?”
Ki yèyè ne: “Wàwa mupika ke mfùmù wa bakwàbò bwònsò anyi?”

Yèyè ne: “To, yèyè’s udi ànu mupika wetù wa pàtupù ewu.”

Yèyè ne: “Èè, pàmwàpa udi umudiisha bishìilàngàne’s.”

Yèyè ne: “To, ùdi udiilà mu cìkukù amu ne bakwàbò bapika bònsò abu.”

61 Yèyè ne: “Èè, cìdi cìmuvwija mushìilàngàne bikolè ne bakwàbò bapika bwònsò abu ncinyi?”

62 Yèyè ne: “Èè, eci’s cìmvwa ndikonka, mèmè pàanyi, kùkaadi ntàntà mule. Kàdi dīngà ditùkù mèmè kumvwa, ne, lwà mu buloba bwèndè mwàkafùmàye amu, tatwèndè mfmùmù wa cisàmbà cijima. Kàdi nànsha mudiye mwenyi emu, kàbìdi mwikale kule ne kwàbò, cikola mmumanye ànu ne mmwànà wa mfùmù, nènku yèyè—yèyè ùdi ùditwala yèyè mwine bu mwànà wa mfùmù.”

63 Mèmè kudyàmbidila ne: “Kàdi, aci, piikala Muntu mufiike ùfùmina mu Àfrikè, ne mumanye ne tatwèndè uvwa mfùmù wa cisàmbà cyà bantu ne mfùmù kumutù kwà cifuku kampànda, ncinyi cìvwàbi mwà kwenzela mwena Kilistò udi mulediibwe cyàkàbìdi, muntu mulùme anyi mukàji, bwà ne Taatù wetù ùdi Mfùmù wa mu Dyulu mu Butùmbi!” Bìvwa bikèngela twètù kuditwala bu beena Kilistò balùme ne bakàji. Bìvwa bikèngela bwà twètù kwenza maalu mùshindù awu, kulwàta mùshindù awu, kwakula mùshindù awu, kwikalala ne nsòmbelu wa mùshindù awu. Nànsha twètù biikale beenyi, nànsha nànkù tudi bânà bà Mfùmù. Amen.

64 Ngiikadilu wetù, dinyangakaja dyètù dyà nsòmbelu dyà mu matùkù atùdi ne mwoyi mpindyewu aa! Izàlèlèlè uvwa mudishinde mu biibidilu ànu bimwèbimwè abi ne ùvwa kàbìdi ne nsòmbelu wa masandi. Bàkaavwa bapwè mikenji yà Nzambi mwoyi: “Kwendi masandi, ne kwàlakanyi mukàji wa mwena mutumba neebè to,” ne bikwàbò. Bàkaavwa bapwè mikenji ayi mwoyi. Bòbò—bòbò—bòbò kabàcivwa kàbìdi bayiswe to. Nènku bàvwa—bàvwa baswe bwà—bwà kufwànangana ne bakwàbò bàà pa buloba abu’s, ànu mùdi èkèleeziyà mufike leelù ewu emu.

65 Musangu kampànda, Izalèèlà, pàakabangabo, pàakajingabo kwikala ne mfùmù kumutù kwàbò. Samwèlè wàkabàmbila, mupròfeta uvwabò babàtùmine awu, yèyè ne: “Mpindyewu kacya nkaadikù munwàmbìle cintu kampànda mu Dìnà dyà Mukalenge cidì kaciya cyenzèke anyi?”

Bòbò ne: “To, kwèna mwanjì kutwàmbila bwalu kacya kabùyi bwenzèke to.”

66 “Kacya nkaadiku munùlòmbe byàkudya byànyì ne mfranga, mfranga yènù, kàbidì, bwà mèmè kwikala ne mwoyi anyi?”

67 “To, kùtukù mwènze aci to. Kacya kùtukù mutwàmbìle cintu nànsha cimwe, Samwèlè, cidì kaciya cyenzèke to. Ne kacya kutukù mutùlombe mfranga yètù to, bwà wèwè kudilakù to. Kadi, nànsha nànkù, tudi tukeba mfùmù, bìbandè bìpwekè.”

68 Nzambì kwambilaye Samwèlè ne: “Bàlekele bàmùpetè. Ki ng’wèwè udibò babèngè to; Mèmè ngudibo babèngè.”

69 Izalèèlà uvwa mubwele mu lwidì lùmwèlùmwè alu mpindyewu. Kabàcìvwa kàbidì baswè bapròfeta bà Nzambì to. Kabàvwa naabu bwalu to. Nènku bu muntu mwà kulwa, ne kubàtwàdila Dìyi, kàdi kuteeta bwà kubàaluja ku Dìyi, bòbò’s bàvwa mwà kuDibenga. Bàtu misangu yònsò ànu benza nànkù, mu dinyanguka dyà mùshindù awu adi.

70 Pàdi buloba ne èkèleeziyà bìdiswika pàmwè, dībà adi kī mbaswè cintu nànsha cimwè cyà nyumà to. Kī mbaswè EMU MMÙDÌ MUKALENGE WÀMBA to. Bòbò mbaswè cidìbo baswè aci. Bòbò mbaswè maalu à buloba, eku bàmba mùdìbo beena Kilistò; ne biikale ne mwoyi mu maalu à buloba, ne benza maalu à pa buloba, ne biikale ne nsòmbelu mufwànàngane ne wa bàà pa buloba, cikòla kacya ànu balame ditonda dyàbò dyà ne mbeena Kilistò adi. Nudi bamanye’s, bwalu bùdì ne, ndisaamà dyà cipwàmwòyi cyà nyumà. Kì dyòdì adi menemene. Kì mbamanye ne bwòbò mbanganyì to. Bàkaadi bapwè mwoyi ne cidìbo ne cyà kwenza.

71 Bu muntu mwà kulwa leelù ewu, mùshindù awu, nùnkù’s mmufwànyine kubengiibwa ànu mùshindù ùmwèlùmwè awu. Bòbò bàvwa naadì dyà dibì be, nènku kì mùdìbo naadi kàbidì leelù ewu. Kabàvwa mwà kudifwànyikijaku kàbidì ne bintu bitàmbe-mfukilu to, bwalu kabàvwa babìjinga to. Dìyi, Èvànjeeliyò, bòbò kabàvwa baMuswè to. Dìsaamà dyà mpèkaatù divwa dibàkwate, ne bòbò bàvwa banange ciine aci.

72 Mpèkaatù ùdi ùsànkisha mwoyi ùdi kawùyi mukùdimuke to. Ùdi ùmwèka mwìmpè kùdì meeji àdi kaayi makùdimuke, kàdi’s nñjila wa lufù. Kakwèna cintu nànsha cimwè cidì cishààle to ànu lufù. “Difutu dyà mpèkaatù ndufù,” nènku udi ne cyà kunowa difutu adi. Udi mukùne lupeepà, kàdi udi unowa mvunde mpindyewu.

73 Bimanyinu byà nyumà ne diyiiisha dyà mùsànjeelà mudyànjila kulongolola kùdì Nzambi, kabyàkabànyùkushaku kàbìdì nànsha. Bakàjì bàvwa mwà kubwòndwela mwísù, kàdì kwamba ne: “Mémè ncyéna ne cyà katèèleja cintakanyi cyà mùshindù awu to.” Aci cyôci kaciyi cyenzeke kàbìdì to! Ncinyi ciine aci? Cipwàmwòyì cyà nyumà, ànu cyôci menemene. Bâkaadi bapwè mwoyi ne Nzambi ne Dîyi Dyèndè bìdì cintu cìmwècìmwè, ne Yèyè kèna mwà kuCishintululaku to.

74 Mupròfeta yèyè mujùuke mu cyalu mu matùkù awu ne mufile cimanyinu cyà nyumà, dîyi dyà mukana dyà nyumà, ne kufilaye dîyi dyà mukana mwà Nzambi paanyimà paaci, s’mbafwànyine kuDiseka ànu cyaanàna ne kuDyèlulwila.

75 Nudi bamanye mwàmbila beena kale ne: “Bakùtàkàne bàtu bèndela ne bisàbaatà byà misonso muntaku mwaba ùdì Banjèlò baciina bwà kudyata.” Ki cidi disaamà dyà cipwàmwòyì cyà nyumà edi dyenza ncyôci aci. Cidi cìfikisha bantu ku mùshindù wà kabàyi mwà kwikala ne njiyà munda mwàbò nànsha. Ki mbaswè cintu nànsha cìmwè cidi cyà nyumà to.

76 Angàtaayi disangisha dilelèlè dyà nyumà, mùdì Nyumà Mwímpè wòndopa babèedi ne ujingulula meeji àdì mu mwoyi, ne nuditèèkè munkaci mwà èkèleeziyà yònsò, ànu didyungwija dinèna kaaba aka mu cipalu cyà ndundu emu, kàdì tàngilàayi cidi cìfwànyine kwenzeka’s. Mu tusunsa tukesè emu, muntu yònsò mmufwànyine kajuuka kàdì kupátuka. Kabèèna naaci bwalu nànsha bukesè to. Ki mbaswè kwikala naaci bwalu to. Nebatèeleje miyiiki kampànda yà mu mutù.

77 Kàdì pàkaadibì bìkafika ku Bukolè bwà Yesù Kilistò, ne dibiiikà Dyèndè dyà ku lufù, ne Nyumà Mwímpè, ki mbaswe kwikala naaCì bwalu to, bwalu cidi cibàpiisha. Cidi cibàlakwisha kapyà ne cintu cìvwa cìkèngela bwà bôbò kumanya. Mu bushùwà bwà bwalu, kakwena dinyooka didì dyenza disànkà to, pàdìdì dipeeshiibwa. Kàdì, bìdì ne, wèwè mudilekèlèlè kùdidi, didì—didi dítwàla mamuma à kanyinganyinga. Pa nànkù tudì tujandula ne, pàdì cipwàmwòyì cyà nyumà eci cibùcikila bantu, dîbà adì bàdì—bàdì mu ngiakadilu mubi. Mpindyewu tudì tusangana byà mwomùmwe mpindyewu. Mpindyewu ndi muswè bwà . . .

78 Udi ne cyà kumanyikila. Mwaba kampànda, udi ne cyà kuleeja. Nsòmbelu webè ùdì ùleeja, dilòlò edi, mwaba wùdì mumanyikile awu. Udi mufwànyikijìbwe anyì mu Kilistò anyì pambelu pàa Kilistò. Kwèna pankacinkaci to. Kakùtu cintu pàaci ne mmuntu mukwàcike maala mwikala mu yèyè to. Kakùtu nyuunyi mufiike mutòke to. Anyì udi musungìdìibwe anyì kwèna musungìdìibwe to. Udi munsantu anyì ngènzàmpèkààtù, ewu anyì mukwàbò, ne lwìdì lwèbè lwà nyumà ku Dîyi dyà Nzambi lùdì lùkumanyisha ànu menemene mwaba wùdì mwimanyine. Cyà bushùwà!

⁷⁹ Dìyì dyà Nzambi, dishindika, dijaadika ne dibàtiiza dyà Nyumà Mwimpè didi ànu dyà mwomùmwe ne mùvwàdi mu Ditùkù dyà Mpenta anyì mu cikondo cikwàbò kanà cyònsò. Ne Yesù Kilistò ùdi umwèumwè awu makèèlèlà, leelù, too ne kashidi. Ne lwidì lwèbè ku Cyòci aci lùdi lùmanyisha ne udi ne disaamà dyà cipwàmwòyi cyà nyumà, anyì kwèna naadi. Ncyà bushùwà. Nànsha wèwè mwikàle mulami, anyì nànsha wèwè mwikàle muyiishi, kacyèna cyenza. . . Èyowà, bàdi bàdipeta, bóbò pàabo. Pa nànkù tudì tujandula ne, didi ne cyàmbù ne dikwata cintu cyònsò mu kaabujimà. Mpindyewu tudì tumòna.

⁸⁰ Mpindyewu, bwà kwikala mwena Àmèrikè. Kwikala mwena Àmèrikè, ndi ne cyà kufwanyikijiibwa ne ditùngà dyànyì. Mpindyewu tèèlejaayi ne ntèmà. Kwikala mwena Àmèrikè, pàndi mulediibwe muneemu mu ditùngà edi, ndi nshààla mwena mwàbò, ne ndi mufwànyikijiibwe ne ditùngà edi. Cyònsò cididi aci, ncìndi. Cyònsò ciwàdi aci, ncìndi. Bwalu ndi mufwànyikijiibwe bu mwena Àmèrikè, díbà adi bìdi bìkèngela ngàmbulè bundu bwàdi bwònsò, butùmbi bwàdi bwònsò. Nànsha ciikàle cinyi, ncìndi, bwalu ndi mufwànyikijiibwe naadi. Amen. Ndi muswè nucyùmvwè. Ndi mujaadikiibwe bu mwena mwàbò wa Àmèrikè, díbà adi cyònsò ciwàye aci, ncìndi. Cyònsò cidìye, ncìndi. Ndi ne cyà kwikala citùpà cyàdi. Ndi ne. . . piikalabi ne ndi mwena mwàbò wa Àmèrikè, ndi citùpà cyà Àmèrikè. Ne cyònsò cidìye aci, ncìndi.

⁸¹ Ncyèna ne cyà kupwà eci mwoyi to. Mémè muswè kushààla mwena mwàbò mulelèlà wa Àmèrikè, ndi ne cyà kuvùluka ne ndi cìdi ditùngà dyànyì aci, bwalu ndi mufwànyikijiibwe ne ditùngà dyànyì. Bwà kudipwa mwoyi, anyì—anyì. . . Bwà kudilwàngèena mvità, anyì bwà kudifwila, anyì bwà kutwà nyama ku mikòlo cyònsò cididi ditwa nyama ku mikòlo, ndi ne cyà kucitwa nyama ku mikòlo. Cìdi ditùngà dyànyì aci, ncìndi. Cìdidi ditwa nyama ku mikòlo, ncìndi ntwà nyama ku mikòlo. Bwà kwikala mwena Àmèrikè wa lulamatu, nengiikale mudilongolola bwà kumufwila, kumulwàngèena mvità, kumutwà nyama ku mikòlo, kwenza cintu kanà cyònsò cidiku aci. Ndi citùpà cyàdi. Kwèna mwà kumutwa byanza kùyi muntwe mémè byanza to. Paùdi wamba cintu kampànda cibì bwèndè, udi ucingamba mémè, bwalu ndi mwena Àmèrikè. Kwakula bibì bwènú, bu beena Àmèrikè, ne cidìbo bàmba cibì bwà ditùngà edi aci, bàdi bàakula bibì bwèbè wèwè, bwalu udi citùpà cyàdi. Kanùcipuku mwoyi to; panùdi nupwà mwoyi, díbà adi nudi ne disaamà dyà cipwàmwòyi, cyà bushùwà menemene.

⁸² Nènku, vùlukàayi ne, wèwè kwèna kàbìdi mwena mwàbò wa mu Àmèrikè paùdi kùyi mwà kulwa citùpà cyèndè to. Udi ne cyà kwikala, cìdi Àmèrikè mwikale aci, ncyùdi ne cyà kwikala pèèbè. Ndi ne cyà kwikala mwabanyanganyì nendè. Edi nditùngà dyànyì, ndi ne cya kwikala citùpà cyàdi. Cìdidi aci, ncìndi. Nwamònu's, ciwàye aci, ncìndi. Nànsha ní ùvwa cinyi,

ndi ànu cìvwàye aci.

⁸³ Bwà kwikala mwena Àmèrikè, ngàakadyata mu Plymouth Rock, pàmwè nendè, ne bankambwa. Bìvwa bìkèngela mèmè kwikala nendè; ndi citùpà cyèndè. Mvwa mwendèle ne Paul Revere pa kabalu, bwà kumudimwija ku njiwù yèndè. Mèmè mwikalè mwena mwàbò mulelèlè wa Àmèrikè, ngàakadyata mu Plymouth Rock. Mvwa mwendèle ne Paul Revere pa kabalu, bwà kumudimwija ku njiwù yèndè. Nudi bamanye cìndi njinga kwamba mpindyewu anyi?

⁸⁴ Mèmè kusabuka Delaware mukwàte dibwe dyà mashika, ne George Washington, ne mäsàlaayi èndè àvwa ku makàsà kutupù awu. Mvwa kuntwaku, bwalu ndi mufwànyikijìibwe ne ditungà edi. Cyàkenzaye kuntwaku cìvwa citùpà cyànyì mèmè, cìndi ngenza mpindyewu ncitùpà cyèndè yèyè. Ngàkafwànyikijìibwa ne Washington, ku Delaware kwaka.

⁸⁵ Ngàkiimana ne Stonewall Jackson, pàvwà myandà yònsò mimuzajìle bikolè menemene apu, ne bwòbò kumukonka ne: “Mmunyì mùdi mwà kwimana bu cimanu cyà mabwe, pèèbè myandà mikuzajìle’s?” Kalùmyànà kàà lumùmàmùmà kàà mèsù à bleu aku e kutuutakù bikumbà byàkò mu lupwishi, kwambako ne: “Mèmè ncitu mwà kunwa dimata dyà màyi pàndi nciyi musàkidile Nzambi wa Bukolè bwònsò bwàwù nànsha.” Bìkèngela ngiimane nendè bu cimanu cyà dibwe. Mvwa mwimane mwaba awu ne Stonewall Jackson. Bu mwena Àmèrikè, ndi mufwànyikijìibwe nendè ne mutwè ku cyèndè. Nsabuka Delaware’s wè! Ndwangana mvità!

⁸⁶ Ngàkabàndisha dibèndelà. Mèmè mvwa nààbò pààkabàndishabo dibèndelà mu Guam apu. Paanyimà pàà binunu byà mäsàlaayi à beena Àmèrikè mamane kufila mwoyi wàwò, ne pààkabàndà kasùmbù kakesè aku lubilu kuntwaku ne kubàndishaku dibèndelà kuulu, mvwa mufwànyikijìibwe mu dibàndishiibwa dyà dibèndelà adi; yònsò wa kutùdi ùvwa mufwànyikijìibwe. Beena ntanda bònsò bàà Àmèrikè bààkafwànyikijìibwa ne dibèndelà divwà dilembelele kumutù kwà Guam adi. Pàngùmvù ne bàvwa beele dibèndelà adi kuulu kwàka, binsònji kumpwekelabì pa matàma. Ùvwa mmèmè. Ùvwa ngwèwè. Aci’s cìvwa cyùmvwija ne n’twètù bònsò, patwàkafwànyikijìibwa naaci mwab’awu.

⁸⁷ Cyònsò cìdiye aci, ncìndi. Butùmbì bwèndè bwònsò mbutùmbì bwànyì. Bundù bwèndè bwònsò’s mbundù bwànyì. Pìikalàye mwenze bintu byà bundù, díbà adi’s nebikèngele mmutangile. . .ntwale bundù bwèndè abu’s. Pìikalaye mwà kupeta butùmbì, ndi mpeta butùmbì pàmwè nendè, bwalu ndi mufwànyikijìibwe nendè. Mpindyewu, bwà kufwànyikijìibwa, bìdi bìkèngela bwà mwena Àmèrikè kutwàlayè bundù bwònsò bwà Àmèrikè, butùmbì bwònsò bwà Àmèrikè, cyònsò cìvwàye

aci. Cyônsò cidiye, anyi ciikalaye aci, udi mufwànyikijìbwe naaci.

⁸⁸ Mpindyewu, bwà kwikala mwena Kilistò mulelèlè, bikèngela wikale mùshindù ùmwèùm wè awu. Katwèna baswè kupwà aci mwoyi to. Cyônsò cìvwàYe aci, ndi mufwànyikijìbwe Nendè. Ndi mufwànyikijìbwe Nendè.

⁸⁹ Mònaayi, ne Yèyè ùdi munda mwànyì, ne mèmè munda Mwèndè. Mònaayi, díbà adi, mwena Kilistò yònsò udi mwena Kilistò mùshùwashùwàlè—mwena Kilistò, ùvwa Nendè ne: “Pàakimbà mìtootò yà mu dindà pàmwè ne bânà bàà balùme bàà Nzambì beela mbila yà disànka apu, kumpàla kwà difùkà dyà dyulu ne buloba kwenzeka.” Tuvwa bafwànyikijìbwe mu bukalenga bùdì kabùyi bwà cìfwàkà ne Nzamnbì, mìliyo dìkùmi yà bidimu kumpàla kwà buloba kwikalabò bufùmbiibwe. Mvwa Nendè kale wàwa. Pìikalàbì ne ndi ne Mwoyi wà Cyèndèlèlèlè, mvwa Nendè kuntwaku. Ngàkafwànyikijìbwa Nendè: “Pàakimba mìtootò yà mu dindà pàmwè ne bânà bàà Nzambì beela mbila yà disànka.”

⁹⁰ Mvwa Nendè pàakabiikilàYe Abraham ne bidimu byà—byà makumi mwandamutekète ne bitaanu apu, ne mukàjèndè mwikale ne bidimu makumi àsambòmbò ne bitaanu, ne kumwambila ne bàvwa ne cyà kupeta mwànà. Mvwa nendè pàakiimanàye pa EMU MMUDÌ MUKALENGÈ WÀMBA: “Mèmè nèmpeètè mwànà awu.” Mèmè kwimana nendè. Mwena Kilistò mukwàbò kanà yònsò ewu wàkiimana nendè. Mvwa nendè pàakalwà mateeciibwa èndè. Mvwa nendè pàakabàndàye ku lusongo lwà mukùnà, bwà kulàmbula Izàkà. Mvwa nendè pàakamwènekà cimpàngà cyà mùkòkò aci.

⁹¹ Mvwa ne Yòzefù pàvwàye mubèngiibwe kùdì bânà bààbò, bwalu ùvwa wa nyumà ne bakwàbò bàvwa bàà musunya. Mvwa nendè pàakamanyàye bundù bùvwàye ne cyà kutwàla kùdì bânà bààbò bàà balùme sungasunga. Cìvwàye aci, ki cìndì. Cìndì eci, ki cìvwàye. “Bwalu tudi bònsò umwe mu Kilistò Yesù.” Mvwa ne Yòzefù mu nyongolo wèndè, mu lukita. Mvwa nendè pàakayàye ku dyàbalùme dyà Pàlò. Byàkakèngela bwà wèwè kufwànyikijìbwa nendè.

⁹² Mvwa ne Yakòbò dilòlò adi pàakalwanganaye mvità yà bibulà ayi bufùkù bujimà ne Mwanjèlò apu. Ngàakalwanganà mvità yà bibula, mèmè mwine. Ndi mumanye cyàkapiçilàye. Pa nànkù ngàakalwanganà mvità yà bibula ne Yakòbò mu cikondo cìmwècìmwè cyàkalwanganàye aci, bwalu ndi mwanààbò wa balùme.

⁹³ Mvwa ne Mòsà pàakapwekàye mu Ejiipitu. Mvwa ne Mòsà ku cipuka cìvwà cilàkuka kapyà. Pawikala mwena Kilistò, udi mufwànyikijìbwe ne bantu bàà mu Bible abu. Kanùcipu mwoyi to! Mvwa ne Mòsà pàakamubèngà bantu bònsò. Mvwa ne Mòsà pàakasabukàye Mbù Mukùnze apu. Pàakèèlaye cyanza muulu ne

pàakaseemenaye kumpàla, ne Mbù Mukunze kukàngukayè apu, Ngàkafwànyikijiibwa mu Kilistò ànu pa díbà adi mene, ne mémè mvwa ne Mòsà pa diine díbà adi.

⁹⁴ Cyònsò cívàku beena Kilistò aci, cyònsò cívàku beena kwitabuuja aci, mwena kwitabuuja yònsò wa mpindyewu mmufwànyikijiibwe ne yèyè muntu awu. Nànsha ciikàle cinyi, udi ne cyà kufwànyikijiibwa. Kanùpu aci mwoyi to. Panùdi nucìpwa mwoyi, nudi ne disaamà dyà cipwàmwòyì cyà nyumà; nudi bapwè mwoyi ne nudi banganyi.

⁹⁵ Mpindyewu mufwànyikijiibwe nendè, ne Mòsà, pàakasabukàye mbù apu.

⁹⁶ Mvwa ne Eliyà mu matùkù à Aakàbà, pàakakèngelabi bwà kwenzabo disungula dyà uvwabò mwà kukwàcila mudimu, Nzambi anyi Baalama. Tuvwa nendè pa Mukùnà wà Kaamèlèl, pàakakèngelabi bwà kwenzaye diine disungula edi, bwalu tudi bafwànyikijiibwe mu Mubidi wa Nzambi umweumwe mùvwàye pèndè mufwànyikijiibwe awu. Nànku twètù bafwànyikijiibwe mu Mubidi awu, díbà adi tudi ne cyà kuvùluka ne tuvwa nendè kuntwaku. Ncyà bushùwà.

⁹⁷ Mpindyewu, mémè mvwa ne Davidi, pàakabèngiibwaye kùdi bânà bààbò bàà balùme mene. Mvwa ne Davidi; uvwa pèèbè nendè, wèwè, pawikalà mwena Kilistò. Bìkèngela úfwànyikijiibwe mu dibèngiibwa dyèndè.

⁹⁸ Mvwa ne bânà bàà beena Ebèlu, mu cikùtù cyà kapyà, pàvwà ka—kapyà kakàyi mwà kubwòsha bwà Bwikadi bwà Muntu mwinâyi apu.

⁹⁹ Mvwa ne Danyèlè, mu bwina bwà ntambwe. Ngàkafwànyikijiibwa muntwamu, pàakalwà Mwanjèlò wa Mukalenge kumumanyishisha mwómò amu.

¹⁰⁰ Mvwa mutàmba kwikala Nendè bulelèlè ku Kàlvariyo. Ndi ne cyà kwikala kwòkò aku mu mùshindù wà, ne, ncivwa ànu mufwànyikijiibwe Nendè ku Kàlvariyo pàtupù nànsha, mvwa mufwè Nendè ku Kàlvariyo. Mwena Kilistò yònsò ùdi ne cyà kufwà Nendè ku Kàlvariyo. Wèwè kùyi mufwè Nendè ku Kàlvariyo to, kwènàku mwà kwikala wa ku Bèndè to. Mvwapu pàakafwàYe. Mémè kufwà Nendè. Nènku pashìishe mvwa Nendè pàakabiikàYe ku bafwè. Mémè kuuuka mu dindà dyà Paasàkà pàmwè Nendè, mu dibìikà dyà ku lufù. Cyònsò cyàkenzaYe aci, mvwa ànu Nendè mwaba awu; mwena kwitabuuja yònsò bìvwa ànu byà mwomùmwè.

¹⁰¹ Nènku mpindyewu ndi musòmbe Nendè mu Myaba mitùmbùke yà mu Dyulu mu Kilistò Yesù, ne makolè ònsò à iferno macimuna, ku Yèyè. Mwena kwitabuuja yònsò wa beena Kilistò úvwa musòmbele mùshindù ùmwèumwè awu, bwalu bìdi bìkèngela úfwànyikijiibwe.

¹⁰² Mpindyewu ndi ndisangana, mu matùkù àà ndekeelu aa, pàmwè ne bààbùngì bàà ku beena Kilistò bàdi biitabuuja, bafwànyikijìibwe mu mudimu Wendè wà bwambi. “Yèyè ùdi umwèumwè awu makèèlèlè, leelù, too ne kashidi.” Ndi ndisangana, mu ditùkù edi, mujaadikìibwe mu mudimu Wendè wà bwambi. Udi udisangana mùshindù awu, mwikàle ucìitabuuja, wenda naaci anyi? Mònaayi, byenzedi byàkenzàYe abi, Yèyè wàkamba ne mwena kwitabuuja neenzè cintu cimwècimwè aci. “Byenzedi bìndi Mémè ngenza nenùbyènzè pèènu.” Dìbà adi udi mwà kufwànyikijìibwa Nendè anyi? Dìbà adi pàdi bundù bùlwa pa Dìyì, udikù mwà kutwàla bundù bu mwàkenzàYe amu anyi, nwamònu’s, mufwànyikijìibwe Nendè Yèyè? Ngàkafwànyikijìibwa Nendè.

¹⁰³ Mvwa Nendè mu Ditùkù dyà Mpenta. Mvwa ne bayiidi kuntu kwàka, mufwànyikijìibwe naabo mu dibàtiiza dyà Nyumà Mwimpè.

¹⁰⁴ Ndi ndikonka ne èkèleeziyà kèna mwà kwikala ne cipwàmwòyi cyàbùngì mpindyewu mu mùshindù wà ne kabèèna, bàmwè bàà kùdìbo, kabèèna nànsha biitabuujaaku ne kùdi cintu pàaci ne n’Nyumà Mwimpè to. Nudi numòna mwaba wùdi èkèleeziyà ùsanganyibwa anyi? Dìsaamà dìbi be dyà cipwàmwòyi! Nwamònu’s, bàkaadi bapwè mwoyi ne ùvwa n’Yesù Kilistò kale wàwa. Bàkaadi bapwè mwoyi cìvwà Yesù Kilistò. Bàkaadi bapwè mwoyi. Bàvwa beela meeji ne Yèyè ùvwa ànu mu—mwedi wa mikenji wetù ewu, anyi mupròfetà, anyi mu—muntu mwimpè. Bàkaavwa bapwè mwoyi ne Yèyè ùvwa Nzambi. Bààkapwà mwoyi ne Yèyè ùdi umweumwe awu makèèlèlè, leelù, too ne kashidi. Ne èkèleeziyà ùdi ne dìsaamà dìbi be dyà cipwàmwòyi cyà nyumà. Bàkaadi bapwè mwoyi bintu byònsò ebi. Kabèèna kàbìdì bàCyùm vwa to.

¹⁰⁵ Tudi ne cyà kwikala ne bayiidi ku Mpenta, bafwànyikijìibwe naabò. Ngàkafwànyikijìibwa ne diyisha dyà Peetèlo mu Ditùkù dyà Mpenta, mu Byenzedi nshapità mwi2. Ngàkumvwa cyàkambàye. Mémè ndi ngiitabuuja cyàkambàye. Mémè e kutumikila cìvwàye mwambe. Mpindyewu mémè ndi mufwànyikijìibwe mu cintu cimwècimwè aci.

¹⁰⁶ Kanùkwàcikiku dìsaamà dyà cipwàmwòyi cyà nyumà to. Bwalu, wèwè, newùdìfwànyikijè wèwè mwine ne cintu kampànda cikwàbò. Shààla wèwè ànu ne Dìyì adi!

¹⁰⁷ Tuvwa ne Èkèleeziyà pààkamutùmabo ne mudimu kùdi Yesù Kilistò, mu Byenzedi, nshapità wa 16. “Ndàayi pa buloba bujimà, nùkayiihè cìfùkìibwà cyònsò Èvànjeeliyò.” Ndi muswè kufwànyikijìibwa mwòmò amu ne: “Pa buloba bujimà, kùdi cìfùkìibwà cyònsò.” “Bimanyinu ebi nebifilè bàdi biitabuuja,” bàdi mwà kufwànyikijìibwa mu cyòci aci.

¹⁰⁸ Èè, mpindyewu, udi mufwànyikijìibwe ne cyòci aci anyi, anyi udi ne dìsaamà kampànda dyà cipwàmwòyi cyà nyumà,

bwà wêwè kujandula ne kwêna witabuuja ne bimanyinu abi bidì bilonda beena kwitabuuja anyi? Nwamònu's, wêwè kùyì uciitabuuja to, díbà adi udi ne dísaamà dyà cipwàmwòyì cyà nyumà, wamònu's, udi mupwè mwoyi ne Nzambì ngudi mulayè aci. Yêyè wákamba ne: "Bimanyinu ebi nebifilè bàdì biitabuuja." Kanùcipu mwoyi to. Kwêna mwà kucipwakù mwoyi kàdì kwikala mwena Kilistò nànsha. Udi ne cyà kufwànyikijiibwa naaci.

¹⁰⁹ Udi ne cyà kwikala mufwànyikijiibwe ne Yone Munsantu nshapítà wa 14, mvensà wa 12. "Ewu udi witabuuja pàmwè Naanyi, byenzedi bìndì Mémè ngenza neàbyenzè pèndè." Kanùcipu mwoyi to. Nwênù bapwè mwoyi, díbà adi nudi ne dísaamà dyà cipwàmwòyì cyà nyumà. Nudi bapwè mwoyi cinùdì. Udi mupwè mwoyi cidì bujaadiki bwèbè bùumvwija.

¹¹⁰ Kàdì bishi, bwà cyàkambàYè ne: "Nwênù bashààle munda Mwànyì, ne Díyì Dyànyì munda mwênù, nudi mwà kulòmba cinùdì baswè ne nebànwènzèlèci"? Udi mufwànyikijiibwe mwaba awu, bwà kwitabuuja ne aci m'Bulelèlà anyi? Maako 11, pààkambàYè ne: "Wêwè mwambile mukùnà ewu ne: 'tentèmùkà,' ne kùyì wela mpatà mu mwoyi wèbè to, kàdì witabuuja ne ciwàmbì aci necyènzekè, udi mwà kupeta cyùdì mwàmbe aci." Udiku mwà kufwànyikijiibwa mwaba awu, bwà kwitabuuja ne aci m'Bulelèlà anyi? Byòbì kabìyì nàнку to, díbà adi udi wenda upeta dísaamà dyà cipwàmwòyì cyà nyumà.

¹¹¹ Nènku—nènku udi upwà mwoyi, udi ujìmija ncincikilù wèbè wa bwena Kilistò. Kwêna mumanye kaaba kaùdì usanganyiibwa to. Wêwè udi wamba ne: "Mémè ndi Méthodiste. Ndi Baptiste. Ki cìndì mumanye pa bwalu abu ncyòci aci. Ndi mwena Mpenta. Ndi *cikampànda*, *cikansanga*, anyi *cikankènga*." Dimukà! Aci cidì mwà kwikala cyùmvwija ne cimanyinu cyà dísaamà adi cidì cìmwènekela pambidi pèèbè, ne udi ne dísaamà kampànda dyà cipwàmwòyì cyà nyumà.

¹¹² Wêwè udi wamba ne: "Èè, Mwanèètù Branham, mémè—mémè ndi ngiitabuuja *cikampànda*, ne ncyèna—ncyèna nangananga..." Mpindyewu anji indilà kakesè. Piikalabi ne Nzambì mmulaye bwà kwenza bintu ebi, ne mwambe ne nebìikalèku mu matùkù à ndekeelu, kadi twitabàayi yènù yìkupangishaci, aci's ncimanyinu cìmpè cìndì mwà kumwèna cimanyinu cyà dísaamà pa wêwè. Ncipwàmwòyì cyà nyumà. Udi mupwè mwoyi bwà kudìfwànyikija ne Díyì.

¹¹³ Wêwè udi wamba ne: "Mémè ncyèna ngiitabuuja ne babèèdì bàdì bondopiibwa to." Udi ne dísaamà dyà cipwàmwòyì cyà nyumà.

¹¹⁴ Wêwè udi wamba ne: "Mémè ncìtu ngiitabuuja dibatiiza dyà Nyumà Mwìmpè to." Ndisaamà dyà cipwàmwòyì cyà nyumà!

¹¹⁵ Wêwè udi wamba ne: "Mémè—mémè ncyèna ngiitabuuja ne Nzambì mmulaye bwà kwenza bintu ebi mu matùkù à

ndekeelu to.” Dîbà adi’s udi mutèèleje twitabàayi kampànda, anyi dilongesha kampànda, pamutù pàà Bible. Udi ne disaamà dyà cipwàmwòyi cyà nyumà. Kwéna mumanye ne udi wa penyi dîbà adi to. Udi ujikula ne udi, “mwena Kilistò,” kàdi uvila Diyì. Cìdi cikwaluja cyàkàbìdi buludi ku disaamà dyà cipwàmwòyi cyà nyumà, wamònu’s, kùyi umanya ne mpenyi paùdi mwimanyine to. Udi ne disaamà dyà cipwàmwòyi cyà nyumà. Kwéna mwà kudifwànyikija wèwè mwine ne Mifùndu to.

116 Bikèngela wìkala ne bayiidi. Bikèngela ushàale ne Mifùndu yònsò, ne Èkèleeziyà pàdiye mutùmiibwe ne mudimu. Kàdi, mpindyewu, pàakatùmiibwà Èkèleeziyà ne mudimu, “Ndàayi pa buloba bujima nukayishe Èvànjeeliyò; bimanyinu ebi nebifile bàdi biitabuuja,” ki cìvwa mudimu mumutuma naawu. Mpindyewu bàdi ne...Awu ke ùvwà mudimu mumutuma naawu.

117 Kàdi mbapiikè disaamà dibì be dyà cipwàmwòyi cyà nyumà, ànu mùvwà Evà mudipetè pa...pambidi pèndè, mu budimi, dîngà ditùkù. Mpindyewu yèyè ùdi bu Izalèèlà, ùsaama disaamà dimwèdimwè edi, disunsuma dyònsò dyà ku sèminère diikala mwà kukupà disaamà dyà cipwàmwòyi cyà nyumà. Dyàyi cyàkudyà kampànda cyà mu sèminère, nènku nenùpete disunsuma, ne pashiishe, katanci aka, nenùpete disaamà dyà cipwàmwòyi cyà cibì be. Kwéna witabuuja cintu nànsha cimwè cìdi Bible wàmba to.

118 Ki lutàtù lùdi naalu èkèleeziyà leelù ewu ndwòlò alu. Ke cìdi cyenza ne katùpeci ditàbuluja leelù ewu ncyòci aci. Ke lutàtù lùdi naalu bantu leelù ewu ndwòlò alu. Bàvwa batàmbe kuyiishiibwa ku kantu ne kantu, ne kasumbù kwònsò kàvwà mwà kutooyika aku, mu mùshindù wà kabàciyi bamanye mwà kutàpulula cìdi cìmpè ne cibì to. Menemene’s. Kéna mwà kuvùluka Mukalenge wendè to. Kéna mwà kuvùluka Diyì Dyèndè to. Kéna mwà kuvùluka mulayi awu to.

119 Alu ke lutàtù menemene lùvwà naalù Izalèèlè, pàakabwela Yesù mu cyalu. Kabàyikù mwà kuvùluka, ne: “Virgo kampànda neimite difù” to. Kabàvwa mwà kuvùluka ne Mòsà wàkamba ne: “Mukalenge Nzambi wenù neajuule Mupròfetà mufwànangane Naanyi” to. Bàvwa ne disaamà dyà cipwàmwòyi cyà nyumà.

120 Ki cyòci aci menemene cìdi èkèleeziyà mupetè leelù ewu. Yèyè wàkamba ne: “Nebyènzekè ne mu matùkù à ndekeelu,” ne bintu ebi nebyènzekè, bitùdi tumòna munkaci mwà kwenzeka ebi, ne èkèleeziyà musòmbe ànu bu mufwè wa kàyì unyunga ewu. Ncinyi ciine aci? Disaamà dyà cipwàmwòyi cyà nyumà. Tudi tudibiikila twètù biine ne Mpenta, kàdi katùyi mwà kufwànyikijiibwa to, ne katùyi mwà kudifwànyikija mu Diyì pàdiDi diyiishiibwe mu bukòlè bwà dibiiikà dyà ku lufù dyà Kilistò nànsha; Pèèndè mwab’ewu munkaci mwètù emu, munkaci mwà kucyenza, ne wènza menemene ànu cyàkambàYe

ne neĒnzè aci. Pashiishe, dimukàayi, ndongolwelu wetù wa cyena màngumbà mmutùbweje mu cipwàmwòyì cyà nyumà. Tudi tusaama. Katwèna bamanye ne tudi bàà penyì to. Ewu ùdi wàngàta mikàndà yèndè mu ewu èkèleeziyà ùya naayi ku èkèleeziyà *mukwàbò*, ne ewu èkèleeziyà, ne aka kasumbù ne *kàka* kasumbù. Nwamònu anyi?

¹²¹ Cidì citùkèngela, kàbìdì, ng'Amòsà mukwàbò bwà kubwelayè mu cyalu, mwikàle ne EMU MMÛDÌ MUKALENGE WÀMBA. Tudi bafwànyine kumwakidila anyi? S'ànù mwàkenzàbo bòbò amu. Kabààkamwakidilaku to. Kabààkuswa kumwakidila leelù ewu to. Kàvwa ne mùshindù wà kubwela mwaba kampànda, bwà kuyiishamù to, bìvwa bikolè be. Mpindyewu, aci ncyà bushùwà menemene, bwalu èkèleeziyà ùdi ùsaama disaamà edi dyà cipwàmwòyì cyà nyumà.

¹²² Mpindyewu, bwà cinyi? Nzambi wàkalaya mu matùkù à ndekeelu aa ne: “Piikalà Mwànà wa muntu mwà kubuuludiibwa,” bilondèshile Luuka, nshapità wa 17: “ku cimanyinu civwa munkaci mwà kwenzeka ku Sodoma, ne necyènzekè cyàkàbìdì.” Ne bantu bàdi bàcìmòna cyenzèke, ne bàmwè bàà kùdìbo kabèèna nànsha bàciitabuuja to. Bòbò bàdi bèèla meeji ne aci ndubuku's. Bàdi bèèla meeji ne nnyumà wa dyabùlù. Ncinyi ciine aci? Bàdi bàsaama disaamà dyà cipwàmwòyì cyà nyumà. Ncyà bushùwà menemene. Kabèèna mwà kuumvwa Mukalenge to. “Yesù Kilistò ùdi umwèumwè awu makèèlèlè, leelù, too ne kashidi.” CìvwàYe musangu awu aci, ke cidìYe mpindyewu.

¹²³ Kàdì, cidì cyenzeke, ncyà ne katwèna mwà kudifwànyikija kàbìdì ne Dìyì to. Bwà cinyi? Yèyè, kì mmumanye ne ùdi diswa anyi ùdi èkèleeziyà to. Kì mmuswè kubiikidiibwa ne diswa to, ne yèyè kèna mwà kubiikidiibwa ne èkèleeziyà to; bwalu, bwà kubiikidiibwa ne èkèleeziyà kampànda, ùvwa mwà kudifwànyikija ne Kilistò. Aci cidì cìmupà disaamà dyà cipwàmwòyì cyà nyumà. Nènku yèyè kì mmuswè kubiikidiibwa diswa to. Pa nànkù kì ng'èkèleeziyà wa beena Mpenta, èkèleeziyà wa ba-Méthodistes, èkèleeziyà wa ba-Baptistes to; ndiswa dyà beena Mpenta, diswa dyà ba-Méthodistes, ne diswa dyà ba-Baptistes, bwalu kèna mwà kufwànyikijiibwa ne Dìyì to. Nènku pàdì Dìyì dimwèneshiibwa, kabèèna ànu bàDìitabuuja to. Ndisaamà, disaamà dyà cipwàmwòyì cyà nyumà. Kabèèna mwà kudimanyisha bòbò biine to; kì mbamanye ne mbàà luseke kaayi to. Ncyà bushùwà.

¹²⁴ Bidi ànu bu mùdì kusopakaja cintu kampànda. Ànu múnkaadi mwambàmbe ne: “Ntu misangu yònsò ànu ngeela meeji ne cìmwè cyà ku bintu bidì bitàmbe kwikala bibùla lungènyi bìnkàdiku mumòne nkampundu.” Nwamònu's, nkasopakaja. Nwamònu's, mamwàkù ùvwa kabalù kakàji, tatwàkù ùvwa mpundà mulùme, ne kakèèna nànsha kamanye ne nkàà luseka kaayi to. Nènku katanci aka, udi—udi—udi—udi

mwà kukàsambakaja ne kupeta mpundà mulùme, nènku dîbà adi . . .anyi kupeta kampundu, kàdi kampunndu kakèèna mwà kulela kampundu kàbìdì to. Nwamònu's, kakèèna mwà kulela kampundu to. Kwèna mwà kukàlongesha cintu nànsha cimwè to. Kàdi ne mutù mukole. Kwàdyàkukàmbilaku cintu nànsha cimwè . . .Kàdi mwà kwolola maci manène male awu. Kàdi nekìndilè too ne ku shòò, kumpàla kwà kwòkò kufwàku, bwà kukusakila. Kwàjikì. Kwòkù katu misangu yònsò ànu kìndilà bwà kukutayishila cintu kampànda, kwòkò ne mùshindù.

125 Nènku aci cidi cingeelesha meeji ku beena Kilistò bààbúngì basopakaja bàà ku dîná aba. Bàkaadi basopakaje èkéleeziyà too ne mùdìbo bapetè dísaaamà dyà cipwàmwòyì cyà nyumà. Kabèèna mwà kulela kàbìdì kantu nànsha kàmwè to.

126 Bàdi bààkula bwà ditala dyà cìtùkùtùkù. Ditala dyà cìtùkùtùkù nkì ncintu to. Ke cintu cibyacìbyalè cyùkaadiku mwelè mwèbè mukana's wè, cintu kanà cyònsò cisopakaja eci. Ki bwà cinyi bìdi bìkèngela bwà wèwè kwangata micì mitenteka eyi, ne bintàkanyi bisopakaja, kubìpwìdijila manga ne kubyòndòpa ne kubyèngeleka. Bwà cinyi's? Bwalu kabyèna mwà kwipataku twìshi to.

127 Kàdi bishuwashùwàle, byà dimiinu dilelèlè, kabyèna bìkèngela bwà wèwè kubyèla bwanga bùdi bushipa twìshi to. Cìdi ne Bukolè mu cyòci, bwà kwipacila bìshiishi abi pabule. Ke cìdi cìkèngela bwà kwipata twìshi twà bupidyà pabule ne muntu mulelèlè mushuwashùwàle wa Nyumà.

128 Angata kampundu kàà kale, kàdi uyiikilangane naakò, wamba ne: "Amba tǔng, mulumyana, ndi muswè bwà wèwè kwenza *cikampànda*, *cikansanga*."

129 Kwòkò's nekàshààle kacya kààsòmba mwaba awu ne: "Hò! Hò! Hò!" Maci manène awu mabàwula àbànda àpwèka. Nkàdi mumònèmòne be—beena Kilistò bààbúngì bàà mùshindù awu, bàà ku dîná's.

130 Wèwè udi wamba ne: "Yesù Kilistò umwèumwè awu makèlèlèlè, too ne kashidi. Bimanyinu ebi nebifilè bàdi bìitabuuja."

131 "Hò? Mèmè ndi ngiitabuuja ne matùkù à bishimà àkaadi mamane kupita. Hò? Hò? Hò?" Nwamònu's, kì mmumanye cìdiye witabuuja to. Kì mmumanyè cintu nànsha cimwè to. Kì mmumanye kùdiye mufùmine to; kì mmumanye kùyaayàye to. Ùdi ne disàamà dyà cipwàmwòyì dyà kabalù. Kàyì mmumanye kùdiye mufùmine to, nènku kèna mwà kuya kàbìdì kule to.

132 Kàdi mèmè ntu munange dimiinu dishuwashùwàlè dyà dikuna ku dikàsà. Kaa, dyòdi's ndyà kalolo. Udi mwà kwakula nendè. Yèyè mmumanye ne papa wendè ùvwa nganyì, maman wendè ùvwa nganyì, ne kakwèndè mulùme ne kakwèndè mukàjì bàvwa banganyì. Yèyè ùdi ne mabèjì àdi àleeja bankambwa bàà kùdiye mufùmine.

133 Nènku mèmè ntu munange mwena Kilistò udi ne bankambwà bàà kùdiye mufùmine, udi mwà kwalukila too ne ku Dìyì dyà Nzambì, too ne ku ditùkù dyà Mpenta, ne kudifwànyikija kwòkò aku ne bansantu, kùvwà Bukolè bwà Nyumà Mwimpè bulwè pambidi pààbò. Awu's ke mwena Kilistò mukuna ku dikàsà. Mmumanyè kùdiye mufùme. Kí mmufwànyikijìbwe ne ba-Méthodistes, ba-Baptistes, anyì ní ncinyì cìkwàbò to. Yèyè mmufwànyikijìbwe mu Dìyì dyà Nzambì. Yèyè mmumanyè ànu menemene mwaba ùdiye mwimanyine. Mashi a bumfùmù à Tatwèndè adi atuuta nkoka munda mwèndè; Mashi à Yesù Kilistò awu's. Yèyè mmumanyè cìdìDi dyènza! Yèyè ùdi witabuuja Dìyì dyònsò. Nzambì ùdi ùkwàcila mudimu munda mwèndè ne ùcìshindika ne bimanyinu byàkalayàYe bwà kulonda abi. Kèna ne dĩaamà dyà cipwàmwòyì cyà nyumà to. Yèyè ndimiinu dishùwashùwàlè dikuna ku dikàsà. Ntu mudinange.

134 Kàdi èkèleeziyà leelù ewu mmubucikila kùdì dĩaamà dibì be dyà cipwàmwòyì cyà nyumà. Kí mmumanyè ne ngwa penyì to. Mmupwè mwoyi byònsò bidì bitàngile Cyòci aci, mmupwè mwoyi bintu byònsò ebi bidì bimwenza Èkèleeziyà.

135 Ncinyì cìdì citàmbe kutùvwija babanji mutùdì emu nùnkù? Ncidítwe kàbidì mu mwaba wà Laòdikiyà, cyalùkilè mu mwaba mubanji ke ànu mùvwà Izalèèlà amu. Pàvwàye mupèlè ne bìkèngela èyemenè Nzambì bwà bintu byònsò bìvwàye ne cyà kwenza abi, byònsò bìvwàye naabi, ùvwà wèyemena Nzambì; dìbà adi Nzambì ùvwà nendè, ne yèyè ùvwà wa nyumà, ne ùvwà ùshidimba. Kàdi pààkabànjikàye, cyàkenzekà ncyòci eci: bimenga byàbò e kudyundabyò, ne bakàji bààbò kudítwabo mu nsòmbelu wa masandi, balùme bààbò kubàànyishilaci, bayiishi bààbò kuumusha mikàlu, ne kubènga baprófètà. Nènku awu ke ngiikadilu mùdìbo babwele. Ncinyì cìvwà cilelè cyòci aci, cìvwà ndipwà dyà mwoyi dyà kùvwà mabènesha awu mafùmine.

136 Ne nwènu ba-Méthodistes, ne nwènu ba-Baptistes, ne nwènu ba-Presbytériens! Nwènu ba-Méthodistes nudi mwà kuvùluka John Wesley. Nwènu ba-Baptistes! Ne John Smith wàkadila mwadi pa maalu à bantu too ne mwàkakèngelabi bwà mukàjèndè kumulombolaye ku mèèsà, bu mùvwà mèsù mamwùle bikolè, bifumina ku didila dyà mwadi ne disambila bufùku bujimà. Mbwalu kaayi's?

137 John Wesley wàkamba cìmwè cyà ku bintu binène. . . Ngeela meeji ne ùvwà ngumwe wa ku baataatù bàà ku cibangidilu bàà ba-Méthodistes wàkamba ne: "Bundù bwà bàna bàà bakàji bàà èkèleeziyà wa ba-Méthodistes, bùvwà bwà kubanga kushààla bàà pa buloba menemene, bàvwa bàvwàla tukànu ku minu yàbò." Ncinyì cìdiye mufwànyine kwamba mpindyewu, ne tùpùtula tùdìbo bavwàla etu?

138 Cìdì cyenzèke ncinyì? Dĩaamà dyà cipwàmwòyì cyà nyumà.

Ànu menemene cìdidi, bapwè mwoyi mwaba wùdìbo bafùmine awu. Nudi bapetè bintu byònsò ebi bwalu mwoyi mwímpè wà dipà, bwímpe bwà Nzambi ke bùdi bucyenze.

¹³⁹ Nudi nwela meeji ne eci ncintu cyà cikemesha anyì? Cidi menemene ànu ne Nyumà wa Yesù Kilstò, cipròfetà. Mu Bwàkabuulwibwà, nshapità mwi3, mbambe ne: “Bwalu wèwè udi wamba ne: ‘Ndi mubanji, ncyêna nkèngela cintu to,’ kàdi kùyi mumanye ne udi mupèlè, mpofo, mukengeledi wa luse, mwena dikenga, butaka, kàdi kùyi mucimanye to” Nwamònu’s, kùyi mucimanye to! Ncinyi ciine aci? Cipwàmwòyi cyà nyumà. Kì mbacimanyè to.

¹⁴⁰ Èkèleeziyà nyìdi ne—ne mfranga mpindyewu. Kakwèna èkèleeziyà, pamwe ne yònsò, mu ditùngà emu, wa cyena màngumba, udi kàyi ne mushinga wa miliyò kuvudija ku miliyò yà ndola to. Batùula miliyò ne miliyò ya ndola mu lwibaku lwà nzùbu ne bikwàbò, kàdi biikale bayiisha ne Dilwa dyà Mukalenge dikaadi pabwìpì. “‘Mubanji,’ ne wàmba ne: ‘Ncyêna nkèngela cintu nànsha cìmwè to.’” Bayiishi balongèshiiibwe bimpè be bàvwàbo kacya kabàyi bânjiku kupeta, bamanye tèoloji kupita muvwabo bamanye kale. Kàbìdi bàdi ne nzùbu mitàmbe bunène, mu myaba mitàmbè bwímpe misungùdiibwe yà mu cimenga. Bàdi ne bukenji bwà kwenza cintu kanà cyònsò cìdìbo baswè kwenza aci’s. Nènku pashiishe cyàkènzàbo ncinyi? Bààkapeta disaamà dyà cipwàmwòyi cyà nyumà ne kupwàbo mwoyi ne Nzambi nguvwa mubenzele bintu abi, ànu bu Izalèlèlè.

¹⁴¹ Ne Bible mmwambe cipròfetà, Yesù Kilstò wàkatùma mwanjèlò Wendè kùdi Yone ne kwamba ne, cikondo cyà ndekeelu eci neciikale ne disaamà dyà cipwàmwòyi cyà nyumà eci. Bàvwa “bakengeledi bàà luse,” nwavùlukaayi. Bàdi beela meeji ne mbanène. Bàdi beela meeji ne bàdi ne cintu kampànda. Kadi Yèyè wàkamba ne bàvwa “beena dikenga, bakèngeledi bàà luse, bampofò, biikale butaka, kàdi kabàyi bacimanye to.” Ne kakwènakù mùshindù wa kubàmbila to.

¹⁴² Mpindyewu, bu muntu mulùme mwà kwikala pambelu apa mu mùsèèsù, mufwìshiiibwe bundù, anyì mukàji, butakà, mu mùsèèsù, mpofo, aci’s ncifwanyine kwikala byà byenza ne luse bwà kwikala mu mùshindù awu. Kàdi pashiishe bu ne ùvwa ne meeji èndè mu wòwò, mumanye cidiye, bwà ne ùvwa muntu wètù wà maci ne mèsù ewu, ne ùvwa ne cyà kulwàta bilàmbà; èè, udi upàtuka pambèlu apu; yèyè—yèyè mmuntu ànu wètù wà maci ne mèsù ewu, ùdi ne cyà kufwànyikijiibwa ne bukwàbantu; kadi mwikale pambèlu apu, “mukengeledi wa luse, mwena dikènga, mpofo, ne mwikale butakà.” Kàdi wèwè muye kùdiye, wamba ne: “Mwanèètù, udi butakà.”

¹⁴³ “Mpindyewu, mòna! Mèmè’s ki Docteur *Kampànda!* Wèwè endèlà dyèbè dibòko. Ndi nkwambila ne, mèmè ndi mwena *Cikampànda!* Wèwè kì mbukutàngile nànsha, wèwè munsantu

mubunguluki wa mu malaba ewu, kwèdi maalu anyi dîyi to!”
[Katùpà kàà mukàbà wà mèyi munda mutupù—Muf.]

144 Ûbàmbila ne: “Mbibi bwà mulùme kwenzayè cikampànda, ne bwà bantu kwenzabò bintu bidìbo benza abi.”

145 Nènku nebàkumanyishe mùdi muyiishi wabò wa meeji majikùke. Nwamònu anyi? Ncinyi ciine aci? Bwalu bùdi ne, mbapwè mwoyi mèyi matùma à Mukalenge Yesù. Pashiishe Yèyè atùùlukebi ne énzè bimanyinu ne maalu à kukèma byàkambaYe ne Neénzè abi, bôbò kî mbaswè kubìitabuuja to. Ndisaamà dyà cipwàmwòyi cyà nyumà. Nwamònu’s, bàkaadi bapwè mwoyi! Ne bàdi butakà, kàdi kabàyi bacimanyè to, kabèena bàcyumvwa to.

146 Bàdi beela meeji ne: “Ànu bwalu mèmè ntu wa mu èkèleeziyà, ki cyònsò cidì ne mushinga.” Kaa, mwanèètù, aci kacyèna ne cidìci cyumvwija bwà Nzambi kupita kwikala mwena Franc-maçon yònsò ewu anyi ní ncinyi cikwabo cyònsò eci, diswa dikwàbò kanà dyònsò to. Kwikala wa mu èkèleeziyà, aci kacyèna ne cidìci cyumvwija kùdi Nzambi to.

147 Bidi bikèngela bwà nwènù kwikala bàna bàà balùme ne bàà bakàji bàà Nzambi. Bidi bikèngela bwà nwènù kulediibwa kùdi Nzambi, ne Nzambi n’Diyi. Pàndi ndwà citùpà cyà taatù wanyì, ndi ndwà taatù wanyì yònsò nkòòng. Paùdi ulwa citùpà cyà Nzambi, udi ulwa Nzambi, mu kaabujimà. Dîyi Dyèndè mu kaabujimà, udi uDiitabuuja dyònsò.

Disaamà dyà cipwàmwòyi cyà nyumà!

148 Kàdi bu ne wèwè kuvwa mumanyè ne dîna dyèbè adi divwa ncinyi? Kàdi piikalàbi ne udi, newikalè mufùmìne mu dîkù dîmpè, mùndi ntèkemena ne ke mùdi mufùmìne, piikalàbi ne udi mufùmìne mu dîkù dîmpè dyà bantu, kàdi anji amba túng bu wèwè mwà kupwaku mwoyi dîna dyà dîkù, kàdi upatuka mwab’ewu, mwikale ne nsòmbelu wa bundù? Bàdi bàmba ne: “Dîna dyèbè ki n’Jones to,” anyi cyònsò ciwàdi aci. “Èè, ncyèna mumanye ne mwva nganyi to.” Nwamònu anyi? Èyo, nwamònu’s, aci’s ncintu cidì cikwàcisha bwòwà bwà kwikalamu, ngiikàdilù wa ùkwàcisha bwòwà bwà kubwelamu’s.

149 Èè, ànu mwaba awu ke ùdi èkèleeziyà ùsanganyibwa. Ùdi ne cyà kwikala cimfwànyi cyà Yesù Kilistò. Kàdi mmupwè cyòci aci mwoyi, bwalu ùkaadi ne, bamufunyike munda mwèndè amu, twitabàayi ne mangumba, mudibo biitabe cyòci aci pamutù pàà Dîyi. “Ne bàdi butàka, bampofò, beena dikenga, kàdi kabàyi bacimanyè to,” ne kakùyi ne mùshindù wa kubàmbila to.

150 Ndi mwà kubenga kwikala cyàkàbidì mu Birmingham, kàdi eci ncikondo cimwèpelè ciikalàbo mwà kucitèeleja. Nwamònu anyi? Nwamònu anyi? Cyà bushùwà. Ndi ànu... Ncyèna mwambule bujitu bwà cintu nànsha cimwè to ànu dimyamina dyà Dimiinu. Nzambi ngudi ùDiludika mu buloba mùdiDi ne cyà kuya amu.

151 Bààkapwà mwoyi, èyowà, bààkapwà mwoyi Dìyì dyà mulayi. Bààkapwà mwoyi. Izalèlèlè ùvwa mu lutàtù lwà mùshindù awu pààkalwà Yesù. Bàkaavwa bapwè mwoyi. Kutàngilabò, kaa, kwambabò ne bàvwa biitábùùje ne nekùlwe Maasiyà. Kàadi pààkalwà Maasiyà ne kuDimanyishilaYe ku Dìyì, bàvwa ne bilèlè búngì cyakaa mu mùshindù wa ne bàkaavwa bavwije Dìyì dyà Nzambì kadìciyi ne bwenzeji to.

152 Ne Yesù wàkalaya, kumpàla menemene kwà cikondo cyà nshikidilu ne: “Ànu mwàkadìbi mu Sodoma, ki mwikalàbi kàbìdì.” Nènku cìvwa mwà kwikala cifwànyikijìibwe, kàdi bantu biikale ne bilèlè byà dikema mu mùshindù wà ne bààkavwija mulayi wà Nzambì kawùciyi ne bwenzeji to, ku bilèlè byàbò. Dìsaamà dya cipwàmwòyì cyà nyumà! Dìsaamà dya cipwàmwòyì cyà nyumà ke cìdìci menemene. Nwamònu’s, bàkaadi bapwè mwoyi bintu ebi.

153 “Kaa, mèmè’s ndi mwena *cikampànda*. Ndi—ndi mwenze *cikansanga*. Nkaadi muje maja mu Nyumà. Ndi mwenze *cikampànda*.” Èè, ekèlekèle, ekèlekèle, aci kacyenaku ne dipetangana nànsha dikesè ne cyòci aci to, nànsha kakesè.

154 Mmunyi mùdi mwà kwikala mwena Kilistò kàdi kuvila Dìyì? Kwèna mwà kucyènzakù to. Nzambì ùdi Dìyì. Pùikalàbi ne Dìyì didi munda mwèbè, wèwè ne Dìyì nudi cintu cimwè. Cyònsò cìdì Dìyì aci, s’ki cyùdi. Amen. Pùikalàbi ne mèmè ndi ne mwoyi mu lukòngo elu, cìdì citùpà cyà Dìyì edi cilayè bwà lukòngo elu, bikèngela ngiikale cyòci aci. Byòbì bikèngela bwà mèmè kwikala mwena Kilistò, ndi ne cyà kwikala mufwànyikijìibwe ne cyònsò cìdì Bible ùyiisha ne ùtwa nyama ku mikòlò aci.

155 Àlèluuyàh! Nudi mwà kumbiikila munsantu mubùngùluki wa mu malaba’s, twamb’eku twamb’eku, kàdi ngaalu kudyùmvwà mutèndeleeedi be mpindyewu ewu. Èyowà’s, mukalenge.

156 Bikèngela ngiikale mufwànyikijìibwe ne byònsò bìdì Bible wàmba. Dìdì ne mwàdì mwàmbambàdì, nènku, mèmè ncìyi mutuucike kùdì disaamà edi dyà cipwàmwòyì cyà nyumà dyà mu ditùkù dyà cyèna leelù edi, Nengiikalè ne ndi mwà kwikala mufwànyikijìibwe naaDi. Kàdi mèmè muDivile, díbà adi ndi mukwata kùdì disaamà dyà cipwàmwòyì cyà nyumà; cintu kampànda ncyènzeke, Ndi mwitabe twitabàayi anyì dilongesha kampànda, anyì ekèleeziyà kampànda anyì cisùmbù kampànda cyà bantu. “Ncyèna mwà kucyènza to,” pàcìdì ànu Dìyì dilwa ne diDimanyisha.

157 Ki bwà cinyì Yesù kàvwa mujingùlùdìibwe to. “Kaa,” mùdìbo bàmba, “èè, ewu muntu’s ngwa cijila, ne mwakwidi wetù wa cijila, *kampànda* wetù wa cijila.”

158 Ki Yesù kwamba ne: “Nudi bàà tatwènù, dyabùlu, ne byenzedi byèndè’s ke binwènzà.”

159 Nutukù bamanye ne Kaayinà wàkalàmbula mulàmbù mwimpè, yèyè pèndè anyi? Úvwa ne meeji matòoke, kwasa cyoshelu, kutwà binù ne kukuukwilayè, ne kufilayè mulàmbù, ne kutùmayè disambila kùdi Nzambì. Nènku piikalàbi ne, Nzambì, ki cyònsò cidì Nzambì ùlòmba, bwà wèwè kwikala wa mu èkèleeziyà ne kwasa cyoshelu, ne kufuta byàdiikùmì byèbè ne kuya mu èkèleeziyà, ne kwikala ne nsòmbelu mwimpè; piikalàbi ne ki cyònsò cidìYe ùlòmba aci, Yèyè ùvwa ne kànsungànsungà bwà kupiisha Kaayinà, bwalu's wàkenza cintu cimwècimwè aci. Èyowà's, mukalenge. Aci's mmwômò menemene.

160 Kàdi *ntèndeleeu* mbwena kwamba ne “cibwikilu,” nènku kwèna mwà kwikala mubwikila kùdi byenzedi bimpè byèbè wèwè mwine to. Kùdi cintu ànu cimwèpelè ciikalà Nzambì mwà kwitaba, ne cyòci aci m'Mashi à Yesù Kilstò. Ki cibwikilu cimwèpelè ncyòci aci. Pa kuumusha Aci, wèwè mwambe ne: “Lama twitabàayi,” disaamà dyà cipwàmwòyì cyà nyumà! Ki cidì cyenzèka ncyòci aci.

161 Mpindyewu mònaayi, bàkaadi bapwè mwoyi Dîyi dyàbò. Bàkaadi bapwè mwoyi Bible. Bàkaadi bapwè mwoyi mulayi. Bàdi bateeta kwikala ne nsòmbelu wa bukènkè butòndoke bwà civwà ba-Méthodistes, civwà ba-Baptistes aci, civwà kampànda mukwàbò. Mulayi wa ditùkù's ngwòwò ewu, ne Nzambì mwikàle ùWàmbila ku Dîyi Dyèndè, ne ùshindika cyàkàbidì ne ùjaadika ne Dìdi nànkù, kàdi bòbò kabèèna ànu baCìitabuuja to. Cipwàmwòyì cyà nyumà! Aci's ncyà bushùwà menemene. Mu kaabujimà, mu kaabujimà bàsaama disaamà dyà cipwàmwòyì, kakùyi mpatà to kabàyi bàCìitabuuja to nànsha byà kumòna lufù.

162 Mùsàlaayi wa beena France. Bàvwa bandondèle kaabwalu kakesè; kumpàla kwà twètù kujikija. Ncivwa mumanyè ne dìbà dikaavwa nànsha diyè bikolè nànkù to, pàanyi muciiikale ne mabèjì matwè ku diikumi à bintu bìndi mufùnde bìdi bishààle; nembyàngàte cikondo cikwàbò. Mònaayi, mùsàlaayi wa cyena France. Bàkalwa ne musumbà wa màsàlaayi àfùmina mu cilwilu, nènku àvwa makwata kùdi disaamà dyà cipwàmwòyì edi. Ndifùmìne ku cikùmìnà, cyà mu mvità. Nènku bàvwa ne ndongamu kampànda, nènku bàvwa—bàvwa bàbiikila ne bàlekela bantu bàvwa ne bantu bàbò bapangike bwà kubiikilabo ne kumòna ní bàvwa mwà kumanya bânà bàà balùme aba. Kakùyi ditekemena bwàbò to, pàmwàpa umwe anyi bàbidì, mu bòbò amu, bàdi bàpeteka. Nènku dìbà adi bàvwa bàngata bàvwa bashààle abu, bàkabèèla mu nzùbu wa babèèdì, mùvwàbò ne cyà kushààla basòmbele matùkù àbò ònsò à mwoyi.

163 Bàvwa munkaci mwa kubànda ku lukeske lwa kakùnà, kàwulù kènda kàbànda; ne kwimanabo mu ngàlà kampànda, balekela bansongàalùme abu bàpàtuka ne bwòlola mikòlò. Ki balami kupatukabo pa kakùnà apu, bwà kubàtàngilabo,

bwalu ne disaamà dyà cipwàmwòyì adi, mòna's, bìvwa—bìvwa bìkèngela kwikalabo babàtangila.

¹⁶⁴ Pa nàнку e kumònabo nsongààlùme kampànda mwaba awu, kupàtukayè e kubangaye kukenzakana ku ntanki wa màyi aku, kukenzakanaye eku ne eku kwà kakùnà. Kudikupulaye kwìsù, kulongaye. Nènku kutàngilayè cyàkàbìdì, e kumònayè ntanki wa màyi awu. Kukènzakanayè eku ne eku kwà ngàlà, e kukùtulayè lwendu. Pamutù pàà mulami kumwimanyikayè, wàkamutwà mu nyimà.

¹⁶⁵ Kubàndayè kuulu dyà mwàmwa dyà kakùnà, wènda wupweka ne kajila kakesè, kukùdimukayè ku dyàbalùme ne kubàndaye pa kakùnà kakwàbò kakesè, ne kulwayè ku kazùbu kakesè kàà mici. E kutàngilayè. Kupàtukaku mu lutanda amu, muntu mununu mwikalè ne dikombo mu cyanza cyèndè, kupàtukayè e kumwela mu citupà. Yèyè ne: “Mwanàànyì wa balùme, mvwa mumanye ne uvwa mwà kwalukila. Mbàngambile ne wèwè uvwa mufwè, kàdi mvwa mumanyè ne uvwa mwà kwalukila.” Ki mwànà wa balùme awu kwalukilaye mu yèyè mwine. Cipwàmwòyì cyèndè aci kuumumukaci. Ùvwa mwà kujingululà ne yèyè ùvwa nganyì. Kumanyayè ne awu ùvwa ntatwèndè.

¹⁶⁶ Kaa, mùsàlaayi wa ku Nkùruse, ùvwa mupeta mukùmù wa ku diibidijiibwa dyàbùngì menemene, mikùmù bùngì cyanàànà yà dingingumba ne twitabàayi, ne bintu byà pa buloba, bwà cinyì kuyikù ànu mwà kwela cidya bwà tusunsa takesè kuya wenda ukenketa mu Bible? Udi mufwànyine kulalakana, ne udi mufwànyine kudisangana mufwànyikijiibwe mwab'ewu mu Dîyi, bu mwena kwitabuujà, dimwè dyà ku matùkù àdi panshì aa. Udi mufwanyine kwikala kuyi muMumanye nànsha. Udi mwa kupingana mu wèwè, mwàkenzà mwànà mutùlùlavi wa mfranga awu, kàdi kudipetululà wèwè mwine. Udi mufwànyine kupeta dimanyishiibwa dyèbè mu Mèyi à Nzambì.

¹⁶⁷ Muntu kampànda ùvwa wàmba, ditùkù adi, ànu àbìdì àdi panshì aa, wàmba ne: “Kadi, Mwanèètù Branham, anji tùtàngilebi tùng twètù beena Mpenta, èkèleeziyà bulenga kaayi's yitùdì naayi ayi. Mòna's, twètù, tudi ne bambi bàdi balongeshiibwe.”

¹⁶⁸ Tèèlejàayi, pàdi mulùme ùsela mukàji, katu wèyemena bulenga bwèndè bwà kwìsù to. To. Yèyè ùdi wèyemena lulamatu lwà ku mucipù wèndè, dîyi dyèndè. Yèyè kèna wèyemena bulenga bwèndè bwà kwìsù to. Yèyè udi wèyemena lulamatu lwèndè.

¹⁶⁹ Nènku ke mùshindù awu ùdìbì díbà dyùdì usèdiibwa kùdì Nzambì, kwèna weyemena èkèleeziyà kampànda mulenga kumòna wa munène unùdì mwà kwibaka to, kàdi mu mulayi wàkafilà Yesù Kilistò, ne: “Mémè ndi umwèumwè awu makèlèlèlè, leelù, too ne kashidi.” Nudi nwitabuujà nàнку anyi?

Twinyikààyaaku mitù yètù ànu bwà katanci kakesè cyanààna.

170 Ndi ndikonka, dilòlò edi, mu citanda emu ní mùdi bantu basòmbè, mùdi balùme ne bakàji bà Cyendèlèlè, bantu bàyaaya ku Cyendèlèlè, ne wèwè udi mumanye ne dngà ditùkù ne bikèngele bwà wèwè kutuutakeena ne Nzambi. Nènku ndi ndikonka ní udikù ne kaaba kàà cipwàmwòyì aci, kàdi mwikale ujinga. . . Uvwa mumanyikile mu cintu cibì, nènku udi mufwànyine—udi mufwànyine kujinga kwendakanaku, dilòlò edi, ne kujandula ne kwenakù mwà kwikala mufwànyikijibwe mu Kilistò Yesù? Udikù mwà kwela cyanza cyèbè muulu, kwamba ne: “Nsambidilèku, Mwanèètù Branham, ndi—ndi muswe kufwànyikijibwa bu mwena Kilistò mulelèlè, mwena kwitabuujà mulelèlè.” Nzambi àkubènèshè. Nzambi àkubènèshè. Àkubènèshè! Kaa, èyo, lwà mu nyùngùlukilu mwònsò. Mukalenge Nzambi àkubènèshè.

171 Muntu kampànda muulu mu cisàsà, wèwè udi wamba ne: “Mwanèètù, mèmè ndi ngiitabuujà bulelèlè ne aci m’Bulelèlè. Mèmè ndi ngiitabuujà, twètù bu beena Kilistò, katwèna beena Kilistò mùvwàbo ne ciibidilu cyà kwikala kukaadi bidimu to.”

172 Kàdi twàmbè bishi bwà nwènù beena Mpenta, pàvwà baamamwènù ne baatawènù ne ciibidilu cyà kwimana mu mùsèèsù emu, ne kutuuta dikasa dyà kale. Nènku mamwèbè, mùshindù mwine úvwàye ne cyà. . . kwikala muzengele, ne útata neenù nwènù bânà bakesè. Misangu mikwàbò bivwa bikèngela bwà nwènù kwenda kanùyì ne bilàmbà to, ne bikwàbò byònsò, kàdi papa ne maamù bàvwa ne lulamatu ku Bwalu abu, bwà kwikala bakwàte ne babàndishe Kilistò.

173 Tàngilàayi cinwàkenza nwènù beena Mpenta aba. Kukaadi bidimu makumi àtaanu bulubulu, nwènù kupatuka mu bulongolodi. Ki cidi cinuvwija Mpenta ncyòci aci, nwènù kuditàpulula ne mwena bupidyà. “Kàdi ànu mùdi ngulube wàlukila ku bitòci byèndè, ne mbwa ku bilùshì byèndè,” nudi balùkile buludi benze cintu cìmwècìmwè aci, bènze bitòci bìmwèbìmwè binùvwà bapàtùkemu abi. Bwalu bùdi bishi? Disaamà dyà cipwàmwòyì cyà nyumà ndibùdike munkaci mwà bantu. Nudi ne twitabàayi yènù ne mikàndà yènù yà cyena màngumba ayi mpindyewu, ne nudi numvwangana naabo bwònsò, baswè kwikala ne bakwàbò bwònsò. Nudi biitabile bakàji bèenù bwà kukòsabò nsuki yàbò, kulaaba bilaabu byà kwìsù. Nwènù, nudi nubànyìshila bwà kwenzabo bintu byònsò ebi, nwanayisha bintakanyi byònsò ebi mu—mu maèkèleeziyà. Ncinyi ciine aci? Disaamà dyà cipwàmwòyì cyà nyumà.

174 Dìbà adi, katanci aka anyi, pàdi Nzambi ùbanga kwenda munkaci mwà bantu, dìbà adi cidi cyènzeka ncinyi? Kanwena mwà kucyàkidila to. Nwamònu’s, nukaadi nusaama bikolè disaamà dyà cipwàmwòyì adi, nwamònu’s, cintu cìmwèpelè

cinùdiku pèènu buumvwe kacya. Kanwènaayiku nwela meeji ne bìvwa bikèngela bwà nwènu kwela cidya kupatuka mu twitabààyi awu bwà tusunsa tukesè cyanààna bwà kwangata Bible, ne kumòna ne mwena Kilistò udi ne cyà kufwànyikijiibwa ne cinyi anyi? “Bimanyinu ebi nebifile aba bàdi biitabuuja’s!”

¹⁷⁵ Byenzedi, Peetèlo kwambaye ne: “Nyingàlalaayi, muntu ne muntu wa kunùdi, ne nubatiijiibwe mu Dinà dyà Yesù Kilistò bwà dilekelediibwa dyà mpèkaatù, nènku nenùpetè kupà kwà Nyumà Mwímpè; bwalu mulayi udi kunùdi nwènu, ne bânà bèènu balela, ne aba bàdi kule, mu búngi bwónsò bwàbiikila Mukalenge Nzambi wetù abu.” Bòbò banwambila ne Kabyèna nànkù to, díbà adi mpaasàtà wenù udi ne dìsaamà dibì be dyà cipwàmwòyi cyà nyumà. Kèna mwà kudisangana mufwànyikijiibwe ne Èkèleeziyà awu to; kì mbulongolodi to; Èkèleeziyà, Mubidi musokòme wà Kilistò.

¹⁷⁶ Mpindyewu Nyumà Mwímpè ùdi kaaba aka. Yèyè ùdi kaaba aka bwà kwenza ànu menemene cidiYe mulaye bwà kwenza. Mpindyewu panùcidi kaaba aka ne mitù yènu miinyika apa, tungunukàayi ànu ne kusambila. Nyumà Mwímpè akule, Yèyè mwine. Nènku numònebi eci. . . Muntu kanà yònsò ewu mmumanyè aci, mulayi, wà cidiku bwà ditùkù edi. Mpindyewu nwènu bàdi mu lukèngelu, dilòòlò edi, nwènu, bàabúngi bàà kunùdi bàvwà bèlè byanza muulu. Kumpàla kwà nwènu kwenza cyòci aci. . .

¹⁷⁷ Ndi ndikonka, patùdi mwab’ewu ne tusambidila babèèdi menemene apa, ndi ndikonka ní nudikù mwà kupatuka mu bupidyà abu, mu dīgumba adi, mu twitabààyi awu udi unwàmbila ne bintu abi kabyèna mùshindù awu to, udi mufwanyine kunwàmbila ne bintu abi mbyà dyabùlù awu. Pàdibo bènza aci ne: “Kabàadyàkufwidiibwakù luse to, pa buloba ebu anyi mu buloba bùcilwalwà.” Kàdi piikalabi ne Eci m’Bulelèlà? Anji elàayi ànu meeji, ambaayi túng ni m’Bulelèlà, díbà adi nudi penyì? Nwamònu’s, kabyèna bikèngela bwà wèwè kucyàmba ku cyàbwàshi to; ùcítàbùùjè wèwè ànu cyanààna munda mwà mwoyi wèbè. Nènku kùdi bantu mwab’ewu bàdi biitabuuja nànkù. Nyewu ndi musòmbe ànu kaaba aka mene, bwà malòòlò àbìdi à ndekeelu aa, mwikale nditacisha mu cintu kampànda, ànu, ekèlekèle, ndikànda ne mwikale ndya ludimi, bwà ncilu kucitùndubula to.

¹⁷⁸ Nènku wavùluka ne, wèwè mulunda wanyì, aci cidi ànu pankaci pèèbè ne Nzambi. Apu ní ncyà mafi, kàdi pèèbè wela meeji nànkù awu? S’udi mumanye cidi cyènzeka, kwakufwidiibwakù luse nànsha kakesè bwà cyòci aci. Dìsaamà dyà cipwàmwòyi cyà nyumà, neuye buludi mu lufù lwèbè lwà Cyendèlèlè, bupidyà. “Ewu udi kàyi wìtabuuja mmumane kupiishiibwa!”

179 Mpindyewu sambiláku bwà disaamà dyèbè, wǎmbè ne: “Mukalenge Yesù, Wèwè wàkalaya. Mémè. . .”

Nkufwànyineku kwikala beenyi mwaba ewu, bàtù kacya kabàyikù banji kufika mwaba ewu kwònsò eku to.

180 Yesù wàkalaya ne: “Ànu mùvwàbi,” nèngàngatè Mufùndù ùmwèpelè, “mu matùkù à Lotà,” pààkamwèneshiibwà Nzambì mu mubidi wà musunya; ne bantu, Abraham, kasùmbù kasungula aku, kasùmbù kàvwà kabìikidìibwe bwà kupàtùka aku. Nènku dìnà dyà Abram dyàkashintuludiibwa mu dyà Abraham, dībà adi’s ke kumònyè Dìyì divwijiibwe mubidi, ne Yèyè kujingulula meeji àvwà mu mwoyi wà Sarah.

181 Nènku pààkalwà Dimiinu dyà Bukalenge dyà Abraham, ki cyàkenzàYe ncyòci aci, kadi bààkaMubiikila ne “ndémon.”

182 Yèyè kwamba ne: “Mpindyewu pààlwà Nyumà Mwìmpè, neenzè cintu cimwècimwè aci.” Yèyè ne: “Mpindyewu kùdi difwidiibwa dyà luse panùdi nuMbiikila nàнку, kadi, panùdi nwakula bibi bwà Nyumà Mwìmpè, kakwènakù difwidiibwa dyà luse nànsha.”

183 Mpindyewu Yèyè ànyishèkù, mu Bukolè Bwèndè, alweku mu batèèleji aba, mwaba wònsò wunùdi nusanganyiibwa awu, ne dijingulula Dyèndè dyà nyumà munkaci mwà kuleeja ne Yèyè ùdi Dìyì. Mu mùshindù wà ne kwòkò kwikale muntu mwaba ewu mwikale ùsaama disaamà dyà cipwàmwòyi, bwà ne kààkwikala ne . . . kààkwikala ne pààkubingila to, kumpàla kwà dibìikila dyà ku cyoshelu edi kwenjiibwadi.

184 Mukalenge Nzambì àkwacishèku’s. Mpindyewu ne mitù yènù miinyika, munkaci mwà kusambila ne kaneemu kònsò.

185 Nwamònu’s, kùdi inàbànzà kampànda musòmbe mwab’ewu kumpàla kwànyì eku. Mmujiike byanza byèndè kwisù. Udi ùsaama disaamà dyà mongo. Udi kàbidì ne disaamà dyà mutù. Udi ne disaamà dyà cifù. Ne mmusòmbe kaaba aka kumpàla kwànyì eku mpindyewu. Nènku mmufwànyine kumanya ne, kì mmufùmine mu ditùnga emu to. Yèyè ngwa mu cimenga kampànda cidìbo bàbiikila ne Macon. Èyowà. Udi witabuuja ne Nzambì ùdi mwà kungambila ne wèwè udi nganyì anyì? Udi Mandèmwanzele Ayers. Pìikalaci cyà bushùwà, ela cianza muulu. Ndi mwenyi kùdi. Aci’s ncilelèlè, kì mmwòmò anyì? Mpindyewu lutàtù lwèbè lwàjiki. Yesù Kilistò; wálengi civwàlù Cyèndè. Yèyè wàkwondòpù. Mpindyewu citàbùùjè wèwè ànu cyaanàà.

186 Kùdi muntu musòmbe mundekeelu mwà nzùbu emu. Udi munkaci mwà kukeba dibatiiza dyà Nyumà Mwìmpè. Yèyè ùdi ùjinga dibatiiza dyà Nyumà. Yèyè mmwimane kaaba aka kumpàla kwànyì eku. Kì ngwa muneemu emu to, nànsha. Ngwa mu Caroline, mu Charlotte. Dyèndè n’Lepoe. Itabuuja ne mwoyi wèbè wònsò, ne Nzambì neàkuuje ne Nyumà

Mwîmpè, mwanèètù wanyi—wanyi wa balùme, bu wêwè mwà kuciitabuuja.

¹⁸⁷ Apa, lwà ku dyàbalùme dyànyì eku, ki—ki mulùme kampànda ewu ne mukàjèndè basòmbe ànu buludiludì naanyì kumpàla kwànyì eku. Babaka bàbìdì bàà kale, ku dyàbalùme dyànyì eku. Inábànzà awu udi usaama disaamà dyà dila dinène. Bàyèndè udi ne disaamà dyà mwoyi. Kì mbàà muneemu to. Mbàà ku Tennessee kwaka. Mukalenge ne Mandamu Thomas, bu nwènù mwà kwitabuuja ne mwoyi wènù wònsò, elààyi byanza muulu bwà nwènù kumòna mwà kwitaba dyondopa dyènù. Yesù Kilistò ùdì ùnùsàngaja. Ki cyòci aci menemene cyàkalayaYè bwà kwenza. Kàdi kacya bandela ncitu mwanji kumòna bantu aba to.

Cipwàmwòyi cyà nyumà!

¹⁸⁸ Yesù wákamba ne: “Byenzedi bìndi Mémè ngènga nenùbyènzè pèenù. Katanci kakesè aka, bàà pa buloba kabààkummòna kàbìdì to; kàdi nwènù nenùMmòne, bwalu Mémè,” mupinganyi muleeji muntu, “nengìkale neenù, munda mwènù mene, too ne kundekeelu kwà buloba.” “Yesù Kilistò umwèumwè awu makèlèlè, leelù, too ne kashidi.”

¹⁸⁹ Mpindyewu, bwà balùme ne bakàji bàdì muneemu emu, bàdì ànu ne cintu kampànda cinùtacisha, mu mùshindù wà ne kuyiku mwà kumòna ne mmunyi. . .Wèwè, udi ujinga kwitabuuja, kàdi kwèna ànu mwà kubwelamù to, nènku udi muswè bwà bàkusambidile, udi muswè kuMwitaba paùdì mu Bwikadi Bwèndè apu, udikù mwà kulwa ne kwimana ànu ku luseke lwànyì eku, bwà nkusambidile ne nkutentèkèlè byanza. Bu nwènù mwà kulwa buludi kuneeku mpindyewu, nwènù bàdì bàsaama mùshindù awu abu, ne disaamà dyà cipwàmwòyi cyà nyumà, ne bàdì baswè bwà kunùsambidilabò, bwà nwènù kusùlùdiibwa ku dyòdì adi. Pawikala kùyì mwena—kùyì mwena kwitabuuja to, kàdi ujinga bwà kukusambidilabò, seemena mwab’ewu ne wimanè. Nzambi àkubènèshe, nsongàalùme. Muntu mukwàbò ùdikù mwà kulwa anyi? Nzambi àkubènèshe, inábànzà. Lwàku. Nzambi àkubènèshe, nsongàakàji. Muntu mukwàbò ùdikù mwà kulwa anyi? Lwàku, imanyina ànu lwà apa nùnkù, ànu mpindyewu ewu.

¹⁹⁰ Cipwàmwòyi cyà nyumà, ncyènà muswè kutuucika kùdì cipùpù aci to. Nzambi kiitabiku to. Ndekèlèku—ndekèlèku mfwe lufù lwà—lwà nì ncinyì cyònsò, kàdi kundekèdì mfwa lufù alu bu mwena bupidyà to.

¹⁹¹ Lwàku, uMwitabe mpindyewu. Kwenàku muswè bwà kucyènza anyi? Lwàyi ku, ne tùlukàayi ku cisàsà, balunda bàànyì. Kudi ànu bidya bikesè cyanààna too ne lwà kwinshì eku, nènku mbifwànyine kutwala dishiilangana pankaci pàà lufù ne Mwoyi, kùdì wèwè.

192 Tàngilààyi, ncyèna mwà kwenzeja Kilistò cintu nànsha cimwè to. Kilistò kèna ne cyà kwenza cintu nànsha cimwè to ànu cintu cimwèpelè eci: Yèyè ùdi ne cyà kukwata ku Díyì Dyèndè. Ùdi ne cyà kwenza aci bwà kwikalaYe Kilistò, kwikala Nzambi. Ùdi ne cyà kukwata ku Díyì Dyèndè.

193 Mpindyewu vùlukà ne, pawikalà kùyi mutwìshìibwe bwà dilabula dyèbè to, bwà cinyi kwèna upweka mpindyewu. Pawikala ànu wa mu d̄ingumba kampànda, pawikalà mwikùlù wa cyena Mpenta, Nzambi kàtu ne biikùlù to. Yèyè ùdi ne bàna bàà balùme ne bàà bakàjì, kàdi kèna ne biikùlù bàà balùme ne bàà bakàjì nànsha. Nwamònu anyi? Nzambi kàtu naabù to. Yèyè ùdi ànu ne bàna bàà balùme ne bàà bakàjì, ne nudi bamanye ne kanwena nànkù to.

194 Pàmwàpa udi mwakùle mu myakulu, udi mufwànyine kwikala muje maja, udi mufwànyine kwikala mwenze byònsò *ebi*. Abi's bìdi ànu bìmpè. Ncyèna naabi cilumbu to. Kàdi wèwè mucii kale ànu ne disààmà dyà cipwàmwòyì cyà nyumà adi, pweka lwàku, ne ùlwe mwab'ewu ne wìmanè apa. Tusambilà bwà cyòci aci. Udi wamba cinyi? Cidimba cyà èkèleeziyà, ànu—ànu cidimba cyà èkèleeziyà cyà ku d̄inà cyanààna, bwà cinyi kwèna ulwakù mwab'ewu bwà twètù kutàpùlùka naadi mpindyewu mene?

195 Ncyèna muswè kuumuka mu Birmingham emu, kàdi mumamyè ne d̄inga ditùkù, pàlwà Cilumbulwidi, nènku bikèngela ngiimane d̄ibà adi kumpàla kwènù. . . Vùlukàayi ne, nèntuutakeenè neenù cyàkàbìdi. Mémè nc̄iyi mutwilangane neenù pa cyòci eci to, anyi nèntwilanganè neenù ku Cilumbulwidi ne nebikèngele bwà mémè kwandamuna bwà c̄indi mwambe dilòlò edi.

196 Mpindyewu tèelejàayi. Nyingàlalaayi, nwènù balunda bàanyi! Nyingàlalaayi, pàtukàayimu. Patukàayi muntwamu. Lwàyi mpindyewu.

197 Aci's c̄ivwa ne cyà kufikisha mukàjì yònsò udi ne nsukì mibebula mu ditunga edi, anyi mwab'ewu, ku diseemena mwab'ewu mpindyewu. Ncyà bushùwà menemene. Cyà ne, cyà ne kwenà ne ngàsà mukùmbàne bwà kwamba menemene ne: “Ndi—ndi—ndi—ndi muswè, ndi muswè kulekela nsukì yànyì yileepa, Mwanètù Branham.” Bivwa bikèngela. . . “Ndi ne. . . Èè, ncyèna ne ngàsà wa kucyènza to.”

Mòna's, wèwè udi wamba ne: “Aci c̄idi ne bwalu anyi?”

198 Mwab'ewu ànu àbìdi àdì panshì aa, mwambi munènè wa menemene kulwayè kùndi, wamba ne: “Ndi muswe nkutentèkèlè byanza, Mwanètù Branham.” Yèyè ne: “Bantu bònsò bàdi bàkwangata wèwè ewu bu mupròfetà.”

Mémè ne: “Kacya mémè nc̄itukù mwambe ne ndi mupròfetà to.”

199 Yèyè ne: “Kàdi bantu’s bàdi bàkwangata nàнку awu. Wèwè udi misangu yònsò ànu usùnsulula bakàji abu, bwà divwàla dyà tùpùütulù,” nènku—nènku, kaa, muntu wa beena Mpenta’s. Ki yèyè ne: “Pa divwàla dyà tùpùütulu, ne dibebula dyà nsuki yàbò, ne bikwàbò.” Yèyè ne: “Abu kí mbwalu bwèbè wèwè to.”

Mémè ne: “Mbwalu bwà nganyì dibà adi?”

200 Ki yèyè ne: “Bantu abu, bwà cinyì kùyiku ulongesha bakàji abu mùshindù wa kwikalabo, wà kupeta mapà manène à Nyumà, bwà kwambulwisha bantu, pamutù pàà kuteeta. . .” Yèyè ne: “Bòbò’s bàdi bàkutwa wèwè ewu mushinga. Cyùdi ubàmbila wèwè aci’s, mbafwànyine kukwitabuujà.” Yèyè ne: “Bwà cinyì kùyiku ubambila mùshindù wà kupeta mapà manène ne bwà kwambulwishakù bantu, pamutù pàà kwikala ànu ubàpiisha?”

201 Mémè ne: “Mmuniyì mùndì mwà kubalongesha makumi makolè pàdibo kabàyi nànsha baswè kulonga ABC?” Nwamònu anyì? Nwamònu anyì?

202 Bidi bikukengela ubangile kwìnshì, nyingàlàlà cyanààna ufwàfwa! Mpindyewu apu’s mbowà mufwilè mu bwèbè budimi, anyì udi unyingalala anyì ufwàfwa! Yesù Kilistò mmuDimanyishe ànu menemene mwaba ewu, dilòòlò ne dilòòlò dyònsò. Nènku edi ndilòòlò ditùvwà twoya bwà lupàndù elu. Kùdi ànu ndambù wa bidya too ne kaaba aka, ne ndi ne dibà dyàbùngì bwà kwindila.

203 Vùlukàayi, Birmingham, mashi ènù kaèna pambidi pàànyì to. Ndi munùbinge. Nènku pawikala bulelèlà mupete Nyumà Mwimpè, udi ne mpungà wa kulwa mpindyewu. Kàdi pawikalà usaama ne bwena èkèleeziyà bwà mùshindù kampànda bùdì bukupetèshe disaamà dyà cipwàmwòyì cyà nyumà, bwà cinyì kwèna ulwa? Yesù ki bwanga. Kwèna muswè kulwa anyì?

204 Mpindyewu bàmwè bantu mbuumuke ku cisàsà. Mwua mwindile bwà kumòna ne mpenyi piine pàvwàbu, bàpàtuka pambèlu anyì bàlwa ku cyoshelu. Aba bàdi kwìnshì eku aba, lwàyaaku ku nyùngulwilu eku. Ncyà bushùwà. Nwènù bàdi apa aba, lwàyi nunyungulukile cyoshelu, nwàmbè ne: “Ebi byàncyòkeshi ndi mbilekele.” Èyo, bàvwa benda bapweka, bainàbànzà bàbìdì. Abi’s mbimpè.

205 Seemènaayi buludi kuneeku mpindyewu. Ànu bidya bikesè menemene naakù. Ne bidya abi mbifwànyine kwenza dishiilàngana.

206 Mpindyewu, tàngilàayi, ndi muswè kunukonkaku cintu kampànda. Kàdi bu Yèyè mwà kulwa dilòòlò edi? “Kaa,” mùdì wamba, “Yèyè kèna ùlwa to.” Ncyèna mumanye ne Yèyè ùdi ùlwa anyì kèna ùlwa to. Eci ki cimanyinu cyà ndekeelu. Vùlukàayi ne, EMU MMÙDÌ MUKALENGE WÀMBA! Nukaadiku bangùumvwe mwambe cyòci aci kadi kaciyi cilelèlà anyì? Nudi munkaci mwà kumòna cimanyinu cyènù cyà ndekeelu. Aci’s ncyà mu Mifundù. Nukaadi bamòne cimanyinu cyènù cyà ndekeelu,

Mpenta. Mpindyewu kanùbwejakaji ne cyàkalayàYe Izalèlèlà paanyimà pàà Dyambwibwa to; abu kî nwwènu to. Bwènu mbumane kujika, dîbà adi. Nwamònu anyi? Mpindyewu ki dyènu ditùkù edi. Mpindyewu ki cyènu cimanyinu eci. Mpindyewu ki cyènu cikondo eci. KanùMubengi to. Kanwènji nàнку to. Bivwa bikèngela ànu nwènu kulwa. Nudi nwitabuujà ne mèmè ndi musadidi wa Nzambì anyi? Vùlukàayi.

²⁰⁷ Birmingham, ncutukù kacya mwanji kutuutakeena ne bantu batàmbe bwîmpè to. Nudi bantu batàmbe bwîmpè bàà ku bònsò bândi njinga kutwilangana naabu mu nsòmbelu wanyi, kàdi bìdi binùkèngela ditabuluja. S'nuudi munkaci mwà kupùunga ne lufù's. Nudi nwenda nukwacika disaamà dyà cipwàmwòyì cyà nyumà. Nudi munkaci mwà kupùunga ne lufù. Kanwenjikù nàнку to. Fùlulululàayi cinùdi naaci aci. Cijululululaayi cyàkàbìdi, ne lukasa, kumpàla kwà Yesù kulwayè.

²⁰⁸ Èyo, pàdìbo...Tungunukàayi ne kulwa. Bàlekèlaayi ànu batungunuke ne kulwa too ne patwapeta bwònsò, bàdi Mukalenge munkaci mwà kubiikila abu, mwab'ewu. Lwàyi mpindyewu.

²⁰⁹ Umùkaayi ku disaamà dyà cipwàmwòyì adi. Ngàngàbukà munène ùdi kaaba aka mpindyewu bwà kwondopa cyòci aci, kunùumushaci. Wàjaadiki ne Yèyè ùdi kaaba aka. Mbanganyi bàdi baswè kucijingulula, mu dyela dyà cianza muulu, wamba ne: "Ncyà bushùwà ne ndi ncitabuujà; ne Yèyè mmwambe ne Neènzè cyòci eci"? Nwamònu anyi? Mpindyewu Yèyè ùdi kaaba aka. Nwamònu anyi? Nwamònu anyi? Nudi nwitabuujà.

²¹⁰ Nèнку mbanganyi bàdi bamanyè ne ndi nwwambila bulelèlà, ne nudi munkaci mwà kupùunga ne lufù ne biikale dijinga ne ditabuluja? Nwamònu anyi? Mbulelèlà.

²¹¹ Nudi bantu bàà maalu mîmpè. Kanwèna mwà kupeta balenga bapite aba to. Kakwena myoyi mitàmbe bwîmpè yìdi yituuata, kutamba yìdi mu mitèèlù yà bantu bàà kale bàà beena Sud aba aba to. Ncyà bushùwà, bantu balelèlà! Kàdi, bantu wetù, s'mbipiciibwe ne nwènu batàbulùke, ne lùkàsà lwònsò! Mu dîbà dyùdi kùyì mwelèle meeji to, mbifwànyine kwenzeka. Mbifwànyine kubènga kwenzeka; ncyèna mumanyè to.

²¹² Kàdi, vùlukàayi ne, nudi munkaci mwà kupeta didimwija dyènu dyà ndekeelu, pa nàнку nyeemàayi panùdi ne dîbà dyà kunyeema apa. Lwàku mpindyewu. Pàcidìbo ànu benda bàlwa apa, nèntungunukè ànu ne kwindila, bwalu nkufwànyine... Musùukà wumwèpelè wùdi ne musinga wà maloba binunu dikùmi. Ne pàdi ànu bantu baciikale batwìshìbwe... .

²¹³ Ndi muswè kumòna eci cibwayika cilwa ditàbuluja dinène didi mwà kudyàdija mu èkèleeziyà yònsò wa mu nyùngùlwilu emu; bu nwènu mwà kwimanyika matàpùluka ènu wònsò awu ne kuumusha citù cyònsò aci, ne kwitaba Nyumà

Mwîmpè. Nwênù nuvwa nwamba munùdi nuCìitabuuja. Nwênù mbàvwà bàmba munùvwà nuCìitabuuja, ne, pàdiCi cìlwa bwà kuDìmanyisha, díbà adi nenùtapuluke muntu ne mukwàbò. Bwà cinyì kubènga kulamakaja myoyi yètù ne Dìyì dyà Nzambì ne kwitabuuja Bulelèlè? Ki cyôci aci. Nenùtungunuke ànu ne kufwà, nwenda nufwà, nènku nenùkabwele buludi mu Laòdikiyà. Ànu menemene cyàkalayàYe, neCìikale mùshindù awu. Kwena muswe kulwa mpindyewu anyi? Mpindyewu s'ki ditùkù ndyòdi edi. Mpindyewu s'ki cikondo ciitabiibwe. Tàngilàayi nùmonè cìikalà Nyumà Mwîmpè mwà kwenza.

²¹⁴ Mpindyewu ndi muswè bwà bambi bwònsò bàdi mwab'ewu, bàdi bàsànta bwà bantu aba, bàlwe pààbò, kusambila pàmwe naanyi. Lwâyì kùnu, nwênù bambi bwònsò bàdi bàsànta bwà bantu aba. Lwâyì, lwâyì ànu ku nyùngulukilu eku, ne bwelaayi mu bantu emu, mwambi anyi mwambulwishi wa bàdi bàkeba dilabula, mwambulwishi mwîmpè wa bàdi bàkeba dilabula, mukàjì udi muswè kwimana ne bakàjì aba mpindyewu awu. Nèngiitabuuje, ne mwoyi wanyì wònsò ne, Nyumà Mwîmpè neàbwele mu mwab'ewu apa mene mpindyewu ne kuDìmanyisha ànu munkacì mwà bantu aba.

²¹⁵ Mpindyewu lekèlaayi ndeeje bantu aba njila wa kulonda, dyàmbedi. Mpindyewu, balunda bàànyì, cyònsò cyùdi mulwile kaaba aka aci, Yèyè mmucimanyè. Nènku ndi mwà kunujaadikilaci ne, Ùdi mwa kwangata, muntu ku muntu, ne kufikisha ku cyambilu eku, ne kakwèna cintu nànsha cìmwè cyàpangàye kusokolola. Mpindyewu aci citu ànu nkacya pàncìvwà mwàna mutekète. Dipà adi kî dyà bèela mpatà to. Kàdi lukonko ndwà ne, udi mwà kudyàkidila anyi? Udi udiitabuuja anyi? Mpindyewu Yèyè ùdi kaaba aka. Èè, pìikalàbi ne Yèyè ùdi kaaba aka, díbà adi's kùdi cintu ànu cìmwèpelè, Yèyè ùtu ùshààla mukwàte ku Dìyì Dyèndè. Díbà adi itàbùùjaayi ànu ne nudi numupeta, ne numwiitaba, ne nujuuke nwàmbè ne: "Mukalenge Nzambì, ndi mwab'ewu mbwà kumwiitaba," ne kushààla ànu mwab'awu too ne pènzekàci.

²¹⁶ Ànu bu mùvwà Buddy Robinson mwambe musangu kampànda, mu budimi bwà matalà. Kwambayè ne: "Mukalenge, wèwè kùyi mumpèeshe Nyumà Mwîmpè to, paWàlukila Neùsangane mushiki wà mifùbà myùngwile mwab'ewu mene." Ùvwa mujingile mwoyi ku mucì. Ne kwàkupeta kantu nànsha kàmwe kàà kùdi Nzambì to too ne paùdi ushiikila menemene.

²¹⁷ Mpindyewu, nukààdikù bamòne dinowa dyà leelù ewu, nukààdikù bamòne leelù citùdi twenza anyi? Twètù, mu bushùwà bwà bwalu, tudi twètù ne Nzambì mukùmbane mùshindù wà tufika pa cibùmbà cyà ku cyambilu, twamba ne: "Èyo, pàmwàpa bikèngela njuuke." Mpindyewu edi ndilabula dyà buloba bujimà. "Èyo, bikèngela nye nkii mane kuulu." Twamba ne: "Èè, èè, ncyèna mumanyè to. S'ki mèmè ewu, wamònu's." Hum! Mwaba kaayi wa kwikalamu's wè! Kamwena

mudilu wôsha to. Kamwena dizuka to. Kamwena byà ne “bwelaMu to!” Nènku, bu mutangadiki, aci cidi cinshipa pa kumòna bantu bàà Nzambi mùshindù awu. Tudi ne cyà kwikala tulàkuka kapyà.

218 Kàdi, nudi numòna’s, ncinyi ciine aci? Ki cyòci menemene cîmvwà munwãmbìle aci. Bwàkabuulwibwà 3: “Udi civùmùvù. Nènku,” mwàkambaYe, “bwalu udi civùmùvù, nènku Mémè nènkutwilè mukana Mwànyì.” Ncyà bushùwà anyi? Ki cyàkambàYe ncyòci aci. Nènku, piikalàbi ne Yèyè ngudi mwambe nànkù, ki cyènzàYe ncyòci aci. Pa nànkù katwikadikù musùmbà wà nànkù awu to.

219 Udi mwab’ewu, mu lukèngelu. TuMupete, anyi tùfwayi, ànu mwab’ewu mene. Ncyà bushùwà. TuMupete, anyi tùfwayi.

220 Mpindyewu, wèwè mwanèètù wa balùme munanga, mwanèètù wa bakàji, bu mémè mwà kupwekakù ne kunwãmbulwisha bwà kwenza cintu kampànda, ndi mufwànyine bushùwà kucyènzà. Mpindyewu, ku dipà, ndi mwà kukwambila cyùdi muvwile kaaba aka. Ndi mwà kukwambila cidi bwalu, ku Nyumà Mwimpè, ku Nyumà wa Nzambi, ukwambila cyùdi muvwile, cyùdi mwenze, ciikalà matùkù àcilwalwà, anyi cintu kampànda cyà mùshindù awu; kàdi aci kacyèna ne bwalu to. Bikèngela witabe Cyòci eci, wèwè mwine. Cidi ne cyà kwikala wèwè!

221 Mpindyewu ukàadi mudilongolole anyi? Ela cyanza muulu, wãmbè ne: “Ndi mudilongolole. Ndi mudilongolole bwà kufwà mwab’ewu mene.” Mpindyewu kwenji nànkù pawikalà kùyi ùcyamba wambilamu to. “Ndi mudilongolole bwà kufwà ànu mwab’ewu mene, anyi kupeta cindi muswè kupeta kùdi Nzambi.” Amen. Udi mudilongolole cyà bushùwà anyi?

222 Nànkù batèèleji bajuukile kuulu, myaba yònsò. Mpindyewu bwònsò pàmwè, bwònsò pàmwè, tudìswikaayi twètù bwònsò pàmwè. Tùsambilàayi. Nènku twikalàayi ànu. . . Nwènù bambi mpindyewu ndaayi kùdi bantu aba, muntu ne muntu, nènku nudi nuleeja mpàla wa byanza byà Kilistò mpindyewu.

223 Nwènù bàdi bàjinga Nyumà Mwimpè, nwènù bàdi bàjinga dilabula adi, kî ndisaluka dyà mbazù to; udi ujinga Nyumà Mwimpè, Mwoyi, mùtòlokù wà Mwoyi munda mwèbè. Ne udi ujinga kutapuluka ne disaamà dyà cipwàmwöyì didi dikwenzeja bwà wèwè—wèwè kupanga mwà kudimanya wèwè mwine; kwenà mumanye ne mpenyi paùdi mwimàne to; kwenà mumanye cyùdi to; tütapulukàayi naadi ànu mpindyewu ewu! Kùdi Dilediibwa dyà cyàkàbidi mwab’ewu bwèbè wèwè, Dilediibwa dilelèlè, dishuwashùwàle.

224 Mpindyewu tütentekelàayi bantu aba byanza. Tuyaaayi, muntu ne muntu, twèlàayi byanza muulu bwà twètù kusambila ne díyi dimwè.

²²⁵ Taatù wa mu Dyulu, mu Dìná dyà Mukalenge Yesù, enzaku, Mukalenge, bwà ne mu Dìná dyà Yesù Kìlistò, bwà Nyumà Mwîmpè alwe dilòòlò edi, mu diisambòmbò dilòòlò emu, mwàkapweka Nyumà Mwîmpè bu cipeepèlè cìkolè cyà civuma. Swàku bwà bantu aba bàbàtìijìbwe mu Nyumà Mwîmpè. Swàku bwà Kapyà ne Bukolè bwà Nzambì kabìbuumùkù to. Bòbò bashaala kaaba aka too ne mu dindà, bashààle, bashààle too ne pàdì Nyumà Mwîmpè ulwa.

²²⁶ Ki mmwenenu nyêyè awu! Ki cyôcì aci! Ki Cyôcì aci. Ki Nyumà Mwîmpè udi ulwa awu. (Nkaadi mucyènzè. Ndi mumanye aci.)

Kwajiki. Itabuuja Cyôcì aci mpindyewu! UCiitabe! Ûjìlbwayi ne mabènesha Èndè. 🐦

64-0411 Cipwàmwòyi Cyà Nyumà
National Guard Armory
Birmingham, Alabama États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org